



**Erschrockliche gantz warhafftige Geschicht, welche sich mit Apolonia, Hannsen Geisslbrechts Burgers zu Spalt inn dem Eystaetter Bistumb, Haussfrawen, so den 20. Octobris, Anno 82. von dem boesen Feind gar hart besessen, unnd doch den 24. gedachts Monats widerumb durch Gottes gnaedige Hilff, auss solcher grossen Pein unnd Marter entlediget worden, verlauffen hat**


<https://hdl.handle.net/1874/405310>






104  
Marci ultimo.

**D**ie Zeichen aber die da folgen  
werden/denen die da glaubē/seynd  
die: In meinem Namen werden  
sie Teufel austreiben / mit newen  
Zungen reden / Schlangen vertreiben. Vnd  
so sie etwas tödlichs trincken / wirdes ihnen  
nicht schaden/auff die Krancken werden  
sie die Händ legen/ so wirdes besser  
mit ihnen werden.



Dem



Dem Ehrwürdigen

vnd Hochgelehrten Herrn Joanni

Jacobo Kuchner Sacrosanctæ Theologiæ Bac-

calaureo formato, Chori Diui Wilibaldi Canonico, Re-

uerendissimi & Illustrissimi Principis ac Domini, Do-

mini Martini Episcopi Eistetensis, à sacris Con-

silijs Vicario generali, vnserm ges

nädigen / gebietenden

Herren vnd Pa-

tronen.



Hrwürdiger / Hoch-

gelehrter / Günstiger vnd

Gebietender Herr / E. E.

tragen zweifels frey gut

wissen / haben auch vor der

zeit genugsame Inquisitiō

ingenommen / was sich

newlicher zeit für ein er-

schröcklicher Casus mit ei-

A ij

ner



## Worred.

ner Mitbürgerin / so befeffen worden / begeben / vñ  
welcher gestalt derselben widerumb mit Gottes  
hilff dermassen geholffen worden / daß sich nicht  
allein gemeyne Bürgerschaft / sonder auch andere  
frembde / sehr vnd hoch darob verwundern / diesel-  
ben von ferren besuchen.

Wie aber dieses vnsern Widersachern für-  
kommen / vñnd man gemeynlich sagt: Ars non  
habet inimicum, nisi ignorantiam, Reden sie so  
spöttlich daruon / daß es ein Schandt / vnd zu  
erbarmen ist.

Dierweil dann Ehrwürdiger / Hochgelehrter  
Herr / wir von Anfang bis zum Ende mit vñnd  
bey gewesen / vil anderst dann solche Lästernäu-  
ler blodern / gesehen / vñnd mit dem heyligen  
Apostel Ioanne / wol mit gutem Grundt der  
Warheit sagen können / daß wir gehört / vñnd  
mit vnsern Augen gesehen vñnd beschawet / vñnd  
vnser Hand griffen haben / das zeugen vñnd  
verkündigen wir euch.

So haben wir solcher erzelten Vrsachen nit  
vmbgehen sollen (dann sonst wol kein Han mehr  
darnach gekrehet) dasselbig / wie sich der gang  
Han

Vorred.

Handel / von Anfang / biß zum Ende verlossen /  
in Schrifften / Ewer Ehrwürden zu zusenden.  
Bezeugen auch hiemit vor G D T / Ewer  
Ehrwürden vñ jedermeniglich bey vnserm höch-  
sten Jurament / daß die Sachen also im Werck /  
wie sie in Schrifften verfast / beschaffen gewe-  
sen.

Gelangt demnach an Ewer Ehrwürden als  
vnsern Günstigen Herrn vñ Patronum / vn-  
ser ganz vnterdemütig bitten / die wolten es  
durchsehen / vñ do dieselben auß ihrem hohen  
Verstandt erkennen kündten / daß es des Truck-  
(wie dann vil gutherziger Personen ein sonders  
verlangen darnach tragen) würdig / günstig pro-  
mouiern.

Thuen Ewerer Ehrwürden / vns als arme ge-  
horsame Priester jederzeit demütig befehlen / vñ  
bitten dieselben / Ewer Ehrwürden wollen / wie  
bißhero vnser günstiger Herr vñ Patron  
bleiben.

Entgegen wollen wir vns auch mit der hilff  
Gottes / was ehrlichen Catholischen / armen Prie-  
stern gezimbt vñ wol ansteht / verhalten. Da-  
tum



Vorred.

tum widerumb den 24. Octobris/nach Christi  
S I J vnserz einigen Seligmachers Geburt/  
1583.

Ewrer Ehrwürden  
ganß gehorsame.

M. Sixtus Beyerlein Notarius &  
Canonicus Collegij S. Nicolai  
in Spalt.

Georgius Witmerus Collegij S.  
Emerani Canonicus in Spalt.

Br



# Erschröckliche ganz

warhaffte Geschichte / welche sich mit  
 Apolonia / Hansen Geißlbrechts Burgers zu  
 Spalt inn dem Eißtätter Bistumb Hausfrawen / so den 20.  
 Octobris/ Anno 82. von dem bösen Feind gar hart besessen/  
 vnd doch den 24. gedachtes Monats/widerumb durch  
 Gottes gnädige Hilff auß solcher grossen Pein  
 vnd Marter entlediget worden /  
 verlauffen hat.

**G**hat sich günstiger vnd freundes  
 licher lieber Leser / in dem gleich zum  
 End lauffenden 82. Jar/ bey vns ein  
 jämmerliche/ erschrockliche/alldieweil  
 das Stättlein gestanden / vnerhörte  
 Geschichte/ vnd solcher schwerer Casus  
 zugetragen/ daß ein Witburgerin/ von dem in ewig  
 Eit verfluchten vnd vermaledeyten leydigen Sathan  
 vnd bösen Feind/ mit schmeychlenden Worten hinder  
 gangen/ daß alsbald diese Weibsperson ihren Willen  
 darein ergeben/ vnd seinen des bösen betroggen Feind  
 des Worten vnd Zusagen glaubt / ist ermelt Mensch  
 von ihme dermassen zum aller hefftigisten besessen wor  
 den/



Wahrhafftige Geschichte

den/also da man ihr nit Hilff vnd Raht/darmit sie widerumb von ihme entlediget werden möcht/ gesucht/ so wäre vnmöglich gewesen/vnd wann dieses Weibspilde Koffes Stärck gehabt/das solche grosse Qual/Peyn vnd Marter/welche sie von dem Bösen einnemen müssen/in die läng erzeugen vnd austawren hett vermöge/sonder darinnen ersterben vnd verderben müssen. Wie nun aber der Allmächtig Barmherzig GOTT seinen Segen vnd gnädiges Gedeyen gegeben/das diser damals ganz armseligen Person widerumb dermassen geholffen/das billich ein ganzes Land/vnd alle rechte Christglaubige fromme Menschen/mit einem solchen verlorren vnd widergefundenen Schäfflein/ein sonderes Frolocken vnd herzliche Freud haben/vnd GOTT dem HERRN ewiges Lob darumben nachsprechen solten. So kommen mir doch in gar glaubwürdige gewisse Erfahrung/das diese Wundergeschichte erlichen/vns vnd vnserer heyligen approbierten Catholischen Religion abgesetzten Spinnen vnd Todtfeinden/ein solcher abschewlicher Grewel vñ Dorn in iren verblendeten Augen seye/das ein Gottes vnd Ehrenvergessener Clamant am andern Sonntag/vnd dan ein anderer grober vngehobelter Bachant/den letzten Sonntag des heyligen Aduents nechst verschinen ein solches Zetter Geschrey/wieten/rasen vnd toben/auff ihren Cangeln/wider dise Geschichte/vnd dan vnsern Dechant D. Wolfgangum Agricolam Spalatinum/durch welchen sein Priesterliches würdiges Ampt GOTT der HERR dieser ellenden Frayen geholffen/versüret/vnd sich dermassen ihrem Gebrauch gerumelt/das ihre eygene Pfaffen Kinder so vns dieses berichten/vnd mir schier erachten könt



Könden/dann dieser bey vns durch die Krafft Gottes/  
 außgetribene / arge / schandt vnd laster Teufel/ wäre  
 sambt andern seinen Spieß Gefellen widerumb auß der  
 tieffen Höllen/ dahin er durch die Allmächtigkeith Gort  
 tes/ vñ den Gewalt der heyligen Christenlichen Cathor  
 lischen Kirchen verstofften/ herauskommen/ vnd in sol  
 che Gottslästerliche Wortsknecht leibhaftig gefaren  
 seyn / vñnd solche Inzicht auß ihnen reden / dann die  
 Werck Gottes dem Teufel zueygnē/ Teufels Gespänst/  
 Verblendung/ Abgötterey/ lauter Zauberey/ Betrüge  
 rey vñ anders/ wie diese erbare Leut öffentlich gethan/  
 darauff machē. Einen vnuerschuldt ersuchen/allein daß  
 er mit ime befolhene verlorne Seel/ mit müß vñ arbeyt  
 ohne einigen Genieß wider zu recht bringt/ also offent  
 lich wie ein Sawr Bier außschreyen/ außdolhippen/  
 schänden/ vnd auß das aller äusserst schmähen/ist nicht  
 Menschlich/ Christenlich vnd Euangelisch/ sonder vn  
 menschlich/ Pharisaisch/ Ketzerisch/ Teuflich/ vnd gar  
 wie Christus der HERR selbst bezeugt / ein Sünde in  
 den heyligen Geist/ die weder hie noch dorten verziegen  
 wirdt. Ob nun gleichwol dises vnserer auffserzigen Wis  
 dersacher tägliches Schänden vñnd Schmähen so gar  
 gemeyn/ vnd wir ee (GOTT lob) dermassen gewohnet/ als  
 so daß es vns nimmer ant oder seltsam geduncke / auch  
 was vnserer Personen anlange/ vngern ein Federn wider  
 ste spitzen oder scherpfffen wolten. So ist aber hoch zu be  
 dencken vñnd zu behertzigen / daß solche Injurien zu  
 Schmachtröwung vñ Vnehren der höchsten Mayestät  
 Gottes reichen/ vñ wol ein Crimen diuinae laesae maiesta  
 tis genennt werden köndte. Dieweil wir dan zu Rettung  
 Gottes Reputation vnd seines heyligen Namens/ vns

Matth. 12.  
 Marc. 3.

B

nach



Wathaffte Geschichte

Matth. 4.  
Lucz 11.  
Ioann. 9.

nach der Euangelischen Regel vnsers einigen Schul vñ Lehrmeisters IESV Christi richten vnd verhalten müssen/der selbige kundt alle Inzucht/ Nachreden/schänden vnd schmähen der Teufelischen Pharisee/ vnd aller seiner Feind erdulden vnd leiden/ aber wann sie GOTT seinem Himmelischen Vatter/an seiner Göttlichen Ehrer was wolten entziehen/ So allda setzet sich Christus der HERR wider dieselben anderst nit/ dann wie ein lauterer Stähler Berg/ vnd laßt es inen vnuerantwort.

Difem allem nach seynd/die mir vmb des Namens Jesu Christi/vmb seiner Gespons der heyligen Christlichen Catholischen Kirchen/ vmb vnsers heyligen Allseligmachenden Apostolischen allgemeynen Glaubens willen/Gut/Blut/Leib vñnd Leben darzu strecken willig/nicht vnzeilich verursacht worden. Diese ganze Handlung / Histori vnd Wundergeschichte / wie alle Sachen vom Anfang bis zum Ende/auch das ganz hernach folgende Jar vber / sich mit difem Weib verlauffen in Schrifften zumerfassen. Das wolle der güetig Leser/erwerbzigiger/guter/Christlicher Wolmeynig/ allein der Wahrheit/die GOTT selbst ist/zu Zeugnuß vñd gar vmb keines Ruhms willen von vns annehmen.

Anfang der Geschichte.

**B**anns Geißlbrecht Burger zu Spale/der hat sich nach absterbend Dorothea seiner ersten Hausfrawe widerumb zu Apolonia/ weyland Hannsen Franskens von Sachsen / aller nechst bey Luttershausen in dem Warggraffthumb Brandenburg gelegen/ Thelichen verheyrat / allhie Hochzeit gehalten / länger dann ein Jar mit einander gehaußt / hat es doch lezlich der vnfriedliebend / feindselig Asmodcus vñd leidige Ehe



Aufreibung eines Teufels.

Teufel dahin gebracht / daß zwischen ihnen beyden anderst nichts / dann Tag vnd Nacht vil Zanckens / Haderens / Granen / Greinens / Rifen vnd Nagens gewesen / auch darneben so am aller erschröcklichsten grosses Gottslästern vnd vbel Schweren mitgelauffen / auß welchem Gottlosen Leben / vnd wann man GOTT des HERRN also gar vergisset / auß dem Herzen schlecht / er folgt / daß gedachter Geißlbrecht an einem Freytag spat den 19. Monats tag Octobris des verschieenen 82. Jars wolbezechet anhrims Kommen / vnd schlechts seinem alten Gebrauch nach / mit seiner Hausfrawen zu zancken vnd vbel zu schweren anfangt / treiben auch solches / wie ihre meiste Nachbawrn gehört / fast die ganze Nacht vber. Sambstags Morgens kompt Apolonia zu Anna Stadlerin ihrer Nachbawrin / vnd spricht / liebe Städlerin / habt jr nicht gehört was mein Mann heint die ganze Nacht abermal für ein Unzucht vnd Schandt geführt / Ja spricht sie / ich vnd mein Stadler haben es leider nur zu wol / was für ein Ragen gethön vnd Gottslästern ihr mit einander getrieben / gehört / ein ganze Nachbarschafft ist desto vnseeliger / wo man so Unchristlich lebt. Darauff fangt gedachte Apolonia in grimmigen Zorn an vnd spricht. Ey wil mir dann vnser HERR GOTT von diesem häßtigen Mann nit helfen / so wolt ich der Teufel käme / vnd hülff mir von ime. Nun merckt was geschicht / wie gedachtes Sambstags Abent ihr der Geißlbrechtin Kinder Vihe vnder Weyd eingehet / vnd sie dasselbig wie gebräuchlich melcken wil / in dessen Kommen erstlichen zween Vögel wie Schwalben / do doch der zeit keine mehr zu Land / vnd stiegen jr vmb den Kopff herum geschwind. Eh

Das Gotteslästern ist die fährnehmste Ursach.

Auß Zorn hat sie einen Jamor mach.



## Warhafftige Geschichte

6  
 sie sich recht vnter der Ahu vmbsehert / stehe ein langer Mann (aber war leider der Leibhafftige Teufel) neben jr / spricht jr zu / Ach mein liebe Apel wie hab ich ein mit leiden mit dir / das es dir also vbel gehet / bist so hart vñ armselig / hast auch einen solchen argen bösen Mann / der dich so vbel helt / vermeint auch anderst nit / dann er wölle es alles verthun / damit dir nur nichts nach seinem Tod von ihme werde.

Thu eines / folge vnd sag mir zu / das du mein wöllest seyn: Siehe so gib ich dir mein Trew darauff / das ich dich in dieser Stund an ein solch herrlich lustig Ort wil führen / da du für vñd für nichts dann essen / trincken / singen / springen / danczen / vñd in Summa solche gute Täg haben sollest / dergleichen du dein lebenlang nie gesehen noch daruon gehöret. Dann es vmb das Himelreich nicht also wie deine Pfaffen daruon sagen beschaffen ist / ich wil es dir viel anderst weysen.

Auff dieses des leydigen Sathans grossen verheissen / gibt das armselig Mensch auß vñbedachtem Mut ihme die Hand / ergibt vñd sagt ihm zu / sie wöl sein werden / in dem Augenblick wirdt ermelte Apolonia von ihme leitbafftig besessen / vñd als bald gibt er jr ein / vñd rät jr / sie soll eylends mit ihm hin auff den Boden / der Hoffnung / sie solle sich alda erhengen. Wie mehr ermelte Geißlbrechtin vnter den Räuwen auffspringt / der Haußthür zueylet / wirdt ihr vorermelte Nachbawrin derer gewar / schreyt ihrem Mann zu / O Ulrich kom die alt Schätferin (nennt man sonst ihren Mann den Geißlbrecht) ist warlich von Sinnen kommen. Demnach lauffen diese beyde Eheleut zu / vñd eh sie gar zu ihr kommen / legt sie sich vor ihrer Thür in ein  
 Ros



Kotlachen/in willens darinnē zuertrencken. Wie solche auffgehebt wirdt/andere Nachbawre mehr zulauffen/ vnd das besessen arm Mensch wider in das Haus bringe / begert solche nur stracks die Stiegen hinauff/ schreyt/ Lass mich gehen/ last mich gehen/ sehet ihr nie wie Kostlich ich lebe / das ich nichts dann für vnd für esse/ trinck/ spring/ dantz vnd nur gut Leben hab. Wie ermele Apolonia in ihr Stuben gebracht wirdt/haben erstlichen zwen/darnach vier Mann an ihr gnug zuhalten / In dem wirdt es Sambstag/ gerad zu Wittersnacht dem Ehrwürdigē vnd wolgelerten Herrn Wolfgango Agricola Dechant vñ Pfarrherrn ein Bort zugeschickt/ ihre E. sollen eylents auff vnd einen gang zu der alten Schafferin thun/dann dieselbigewäre Nachten Abendes vnbesinnen worden: Aber wolgedachter Herr Dechant vermeynet die Sachen wären bey weyten nicht also häfftig/ wie man ihn erstlich berichtet beschaffen/vnd wolt so spatt/auch an einer so heyligen Nacht nie außgehen / sonder vermeldet/er hett wol Sorg getragen/dieses Gottlose stättige zancken vnd hadern würde lezlich einen solche Außgang gewinnen/befalhe doch/ wann die Geißlbrechtin also vnrichtig das man sie nicht erhalten vnd dāmen kōndte / solt man sie ein weil in zwo Ketten/ wie dann geschahē/ schlagen.

Herr Des  
Chans ward  
zu erstemal  
geholt.

Zu morgens / frū da der Herr Dechant/wie bey den Stifften gebräuchlich in die Ketten gehen wolt/ Kōme man wider/er soll eylents Kōmmen dann er kōndte nimmer mehr glauben/ wie grawsam vnd erschrōcklich das arme Weib tobe vnd wüte. Nach dem die Ketten verriecht/nembt er als einer so vormals in dergleichen Fällen auch schon an den Riegeln gewesen / auff ein Fürsorg



Wahrhafftige Geschichte/

Was Herr ein gar kleines Heylichumb Tafelcin/ darinnen ein ger  
Dechant: ch rechtes Stücklein/ von dem heyligen Creutz / von der  
er zu ihr gan: Saul daran Christus der HERR gegeyßlet worden:  
gen zu sich ge: Mehr nam er ein Agnus Dei, so in Anno Iubileo vnd dan  
kommen. ein weiß Wachs welches Summus Pontifex, Purificationis

selbst geweyhet/ zu ime/ schub es alles auff den Leib hin  
ein/ wie er des Geißlbrechts Haus zu gieng/ die Apolo  
nia sambt ihrem betroggen Wirt/ der sie also jämmer  
lich tractieret/ sein Herrn Dechant nur gewar wurde/  
nimmermehr werden es all die jenigen/ so nicht mit vnd  
darbey gewesen glauben könden / was für ein wüten /  
toben vnd beissen sich allda erhoben/ dann vngerecht/  
das solche an zweyen Rätten außgespant lag/ noch her  
ten vier Mann genugsam vnd von Kräfften an ihr zu  
halten. Sieng vielgedachter Herr Dechant an vnd sager:  
Ach Apel das Gott in dem Himmel geklagt sey/ der groß  
Jammer ist mir ein trewliches Leyd / Christ gelegen

Dieses Weib  
gewinnet gar  
eine starcke  
männische  
Stimm.

dich wie ist dir geschehen / fangt das elend Mensch mit  
einer gar starcken Männischen zu vor an ihr vngewohn  
ten Stim an/ Hui Pfaff spricht sie/ troll dich was frag  
ich nach dir vnd deinem Christ / ich hab mein leben lang  
genug/ siehest du nicht wie wol ich lebe/ daß ich anderst  
nichts thu dann isse/ trincke/ spring vnd dantz/ ich darf  
deines Himmels nimmer/ darauff antwortet ihr Herr  
Dechant/ Ja Apel wie wol du lebest das siehe ich leyder/  
dein gutes Leben so du jezunder fürest/ wolt ich keinem  
Hund/ wil geschweige/ einem Menschen gönne. Greiffe  
jr alle mitten auff den Kopff mit der blossen Hand vnd  
sager/ Apel vnser lieber HERR Jesus Christus/ hat mich  
als seinen armen vnwirdigen Diener zu dir gesandt/  
das ich dich in seinem Namen widerumb soll gesund  
ma

Got der Herr  
re behit alle  
Christen men  
schen vor di  
sem Wir vn  
seinem Wof  
beden.



Aufreibung eines Teufels.

machen / dann du an Seel vnnnd Leib viel Eräncker  
als du selber weißt bist. Vnnnd zu einem Probzeichen / ob  
sie besessen oder sonst natürlich vnbesunnē worden wär /  
nam der Herr Dechant erstlich das vorgemelt Heyl-  
thumb / schub es jr vnwissend / dann sie ihm den Rucken  
wender vnter seiner Hand auff den Kopff / was sich von  
skundan für Jammer / Klagen vnd Wimmerleyßen erho-  
ben / vnnnd wie sie in den Rärten gewüt / mit ginendem  
Waul wie ein beissendes Pferd des Herrn begert / dar-  
von werden diejenigen / so an ihr gehalten / vnd dann die  
ganze Stuben vol Leut / bößers dan seine L. sagē Kön-  
den / anzeigung geben. Ir Geschrey war imer OPfaff /  
OPfaff thu mir das Ding von dem Kopff herab / wo-  
nit / Sihe so sey dir geschworen mit meinē Zänen will ich  
dich zu Stucken zerreißen / deine Füß will ich dir abfres-  
sen / auff das ein Bein wil ich dir stehn vnnnd das ander  
saluo decore auß dem N. reißen / dich darmit zu tode  
schlagen / dein vergifftē Zungen / deine an beyden Hän-  
den vordere zween Finger / wil ich dir mit meinen Knas-  
chenden Zänen abbeißen / darumben troll dich nur mit  
ditem fluchs darvon. Wie sie nun ihm den Text wol  
gelesen / sangt H. D. an daß dir dises klein ring Ding so  
gar wehe thüt / vnd dessen so einen grossen Verdruß vnd  
Onlust hast / kan ich mich nit genugsam verwundern / O  
schrie sie oder der leydige Sathan auß ihr / thn es herab  
vnd leg mir dafür sechs langer Säck voller Stein hin-  
auff / die werden nicht also schwer seyn. So sage mir /  
sprach Herr Dechant / was ist es dann / alsdann wil ich  
es dir alß balden herab thun / Antwortet der Böse / was  
es ist / das weiß ich wol / aber ich wolt dir cum venia in  
das Gesicht scheißen / daß ich es dir sagen wolt. Wie / fan-

Die Prob ob  
eines besessen  
oder nachher  
lich vnbesun-  
nen / ist die  
größte Kunst.

Der Sathā  
wil lieber 6.  
Säck mit stei-  
nen / dann ein  
stücklein vom  
H. Erang vñ  
der Säulen  
Christi tragē



get Herr Dechant mit ernst an/du bekennest wie du wiß  
 sens habest/was dieses schlechte Ding sey / vnd wilt mit  
 der Sprach nicht heraus/ geschwind bringe mir nur ein  
 weiße Hauben/ darmit ich es dir gar auffsetze vnd ni  
 mer herab thu/ Ja antwortet der Böß / du sagest wol  
 ein schlechters Ding / wann es so schlecht wer/ wurde es  
 mich nit also hart brennen. Sage an/vnd ich beschwere  
 dich/bey dem GOTT Abraham/ Isaacs vnd Jacobs/  
 was ist es dann / aber da war kein andere Antwort/  
 dann daß er für vnd für mit seiner vnsaubern weychen  
 Speiß/die ihne Herr Dechant selbst fressen hiesse/vmb  
 gieng. Vnter diesem/ lieber GOTT/das armhart gepey  
 niget Mensch lechzet gar sehr/vnd het bey ihrem verra  
 meinten / Köstlichem Wolleben gern zu trincken gehabt/  
 reichten ihr die Weiber auß des Herrn wincken / erstlich  
 chen ein Tauff/aber da war keines trinckes/sonder wolt  
 ein anders Wasser haben/redet ihne Herr Dechant an/  
 warumben er dieses nicht trincken möcht / wäre es doch  
 auch nur ein Wasser / Antwortet er / Pfaff jez vnder  
 leugst du / es ist deine geschmirrter Tauff. Nach diesem  
 Gaben jr die Weiber des grossen Weyhbrunnens/wel  
 cher alle Jar an dem güldinen Sontag Trinitatis be  
 nediciert wirdt/aber so wenig ihr das vorig schmecket/  
 viel weniger wolt sie dieses weder wissen noch hören/son  
 der man solt es nur geschwind hinweg thun / dann er  
 wüßte wol was es wäre / saget Herr Dechant / wer es  
 doch nur ein Wasser / der Böße antwortet ihme ganz  
 grimmig/du sagest jimmer zu ich liege / aber ich sihe du  
 kanst auch liegen / ist es doch deines Weyhwassers/do  
 man jr aber ein schlechtes Wasser reichte/vnangesehen/  
 daß an den Geschirren / Wassern vnd andern der aller  
 wents

Sathen kan  
 weder Tauff  
 noch Weyh  
 brunn vnd den  
 kennet es als  
 les.



wenigste Unterschied nit war/ spricht sie/ oder er in jr/  
das ist des rechten/ darauß mischen wir die drey Was-  
ser vntereinander/ brachten ihr den Mundt mit einem  
Schlüssel auff/ vnd hetten vnser ein gutes Duzet ge-  
nug zuschaffen/ biß vnd das mir jr es eingossen/ vnd  
in den Hals mit müß hinab strichen/ wie es nun hinab  
gebracht/ fange sie oder er durch sie an/ O Sacraments  
Pfaff wie gehestu mit mir vñ/ Ant: N. D. hinwiderum/  
Ey schmecke dir eins so lasse dir das ander auch schme-  
cken/ dann ich kenne dich wol/ was du für ein arger ver-  
träuffter Gast bist/ Ich vnd du werden noch bessere  
Sprach biß mir vnrecht von einander scheyden/ halten  
müssen. Wie Pfaff woltestu stärker seyn dann ich/ vnd  
mich vertreiben/ ich wolt dich eh zerreißen/ daß du in  
der Sönen hinflugest/ gab jm Herr Dechant Antwort:  
Dich zuvertreiben bin ich für mein Person als ein armer  
sündiger Mensch vil zu schwach/ aber höre du verzweif-  
felter Bößwicht/ du vertrogner abgesagter Feind des  
ganzen Menschlichen Geschlechtes/ einen solche starcken  
Glauben vnd gutes sichers vnzweiffelhaffteiges Ver-  
trauen hab ich/ als ein armer Diener vnd Priester zu  
meinem HERN Jesu Christo/ daß derselbig solches  
durch mich als seinen vnwürdige Werckzeug thun wer-  
de/ vnd du Sathan merck/ dieweil du mir lang vnd  
noch sehr vnd hoch trödest vor GOTT meinem HERN/  
weyß vnd erkenne ich mich leyder für einen armen groß-  
sen Sünder/ aber hierinnen bent ich dir den Trutz/ Ist Dechant als  
mein Christenlicher Glaub welchen ich von jugent auff ein Catholis-  
bekennt/ den ich mit Mund vnd Hand gelert/ wider al-  
len deinen Anhang verfochten/ solches auch vermittelst  
der Hilff GOTT meines Herren vnd Seligmachers  
C. Jesu.



Jesu Christi/die Zeit meines lebens bis in mein Gruben  
 ehun wille. Dieweil du se zu mir aller geringsten Bap-  
 stischem Pfäfflein so gar guten Lust hast/soll dir vor al-  
 ler Welt erlaubt seyn/fahre in mich/treyb deinen Hoch-  
 mut nur wol/kom ich wil dir das Maul nur weit genug  
 auffthun/vñ kein Creutz darfür machen/sieng der Bö-  
 se an/ja faren/faren/kundt ich dir darfür dein Zungen  
 vnd deine Finger erwischen vñ abbeissen/das glaub  
 ich gern saget Herr Dechant/wann es in deiner Wache  
 gestanden/vñnd du mich vñnd einen jeglichen Christen  
 Menschen in Mutterleib hertest könden umbbringen/  
 halt ich gänglich darfür an deinem möglichen fleiß wür-  
 dest nichts haben manglen lassen/aber GOTT der HERR  
 wurdte mich vñnd seine Glaubige wol vor dir bewah-  
 ren/vnd höre Sathan von der Haut lasse ich dir nicht/  
 bis vñnd so lang du mir eh sagest was in dem Täfelein  
 auffdem Kopff ist/antwort er: es ist das Heylig/was  
 für ein Heyliges saget Herr Dechant: Der Böse/das  
 Heylig von Jerusalem/Herr Dechant hinwiderumb/  
 was für ein Heyliges von Jerusalem: Kurzumb mach  
 nicht viel Umbstände/der Sathan/D laß mich zufrie-  
 den/du weißest daß ich es nit nennen kan/der Herr  
 Dechant/das seynd faule lame Außzüg/dann wann du  
 wilt kanstu es wol nennen/umb dessen willen beschwöre  
 ich dich bey dem vnschuldigen Tod vnser HERRN Jesu  
 Christi/daß du kurzumb allda öffentlich anzeigen wöl-  
 lest was es sey. D saget er/es ist halt von dem heyligen  
 Creutz daran vnser HERR GOTT gestorben/vñnd dann  
 von der Saul daran er gegeyselt worden. Herr D.  
 widerum/glaubstu dann daß Christus für vns gestor-  
 ben: Er/warumben wolt ich es nicht glauben/bin ich se  
 nicht



nicht weyt darvon gewesen / woferr du Pfaff das auff dem Kopff wilt herab thun / so wil ich dir sagen von wannen hero du es bekommen. Ja zeyge an saget Herr Dechant. Er der Böse / ist es nicht war / länger dann vor 60. Jaren hat es ein Parfusser Mönch mit sich von Jerusalem herauß gebracht / vnnnd wie dasselbig Closter zerstöret / ist es dir hernacher geschenckt worden. Nun sey GOTT der HERR in Ewigkeit saget Herr Dechant gelobe / du bist von Anfang ein Lugner vnd Todschläger gewesen / niemals in keiner Wahrheit bestanden / danoch hat dir GOTT auff dieses mal ein Wahrheit beschert / dem ist also wie du sagest. Darauß thet der Herr Dechant dieses Heylehum herab / aber nam schlechts das vorgemelt Agnus Dei, leget es vnwissender Ding ihr auff das Haube / klaget / wimmerleiset vnd schry uber das vorig / jezunder gleich wider so sehr. Auff solche seyn Vnsuhr / wolt Herr Dechant abermals ein entlichs Wissen haben / was es dann wäre vnnnd von wannen es käme / daran er sich also entsetzet. Schry der Böse feind / ho ho dahin bringest du mich nimmermehr daß ich dir das sagen / oder die Statt nennet / so soll dich aber saget Herr Dechant die Krafft vnnnd grosse Macht Gottes dahin vermügen / daß du es frey herauß sagen mußt. Wie nun der Reden viel hin vnd wider ergiengen die all nach länges zuerzelen vnvonnöten / vnnnd der böse Geist durch den Singer Gottes getriben würde / fieng er an vnnnd saget / es ist hale ein Agnus Dei. Herr Dechant / wie weyhet man dann dieselbigen? Der Böse / Wann die gang Welt allda stünde solten mich nit nöten daß ich sie nennet. Herr Dechant / auß was Ursachen bist du dann dieser Statt so feind? Ey wer kan ihr hold seyn / der Herr

Sathan weiß wer vor 60. Jaren dieses Heylehumb von Jerusalem gebracht.

Er künde kein Agnus Dei dulden.



Rom ist dem Bösen ein greuel.  
 Dechant/ Ja darumben dieweil in der gangen Welt kein Ort ist da dir vnd deinem Hauffen grösserer Abbruch vnd Widerstandt erwiesen wirdt/ darumben mach nur nit viel Wänß/sonder sag an wie heist sie: Er wolt aber lauter nicht daran/sonder machet andere vnnütze Tarreren Deding herein/ da ihme aber Herr Dechant so hart auff der Socken lag/vnnd von ihme nicht lassen wolt/ sieng er an sie heyst R R R. der Herr Dechant/hui junger Schuler noch bösser/ der Böse/ D D D. Der Herr Dechant/ D ein guter Product auff diesen Schuler/ du verzweyfelter Bößwicht/ du Todfeind des heyligen wahren Catholischen Römischen Glaubens/ setze das W W W auch darzu / so hat dir GOTT ein dreyfache Wahrheit bescheret.

Dieses wirdt gewis vnsern Spdtern vñ Widersacheren ein gelecher machen.  
 Ein Römischer gewesenes heiles Liecht kan er lauter nit leiden.  
 Es ist auch ersichtlich eines geweichten Wachslichts/ so Herr Dechant zu sich genommen/ gedacht worden. Was wunderbarliches sich aber mit diesem anzusehen/ schlechten Ding verlossen/ wissen mir wol das solches jr vielen/ die es nit gesehen/ ein lauters Gespötte seyn wirt. Aber so war als GOTT/ was mir hierinnen zeugen / ist alles/wie im fall der Not/ mit einer grossen mänig ehrllicher Leut kan erwiesen werden / wahr. Die Scriben darinnen dieses ellende Weibspild lage/ ist gar finster/ so hat sich dieses alles/ was bishero vermelet worden/ zu morgens früh vnter den Liechten/zugetragen. Also/ daß man von Wachs/ vnnd andern der Liechter/ viel hin vnd wider brinnende het/ diese alle künde der böse Feind dulden/ thet darab kein Wänckerlein / so bald aber dieses hinder dem armen Weibsbildt angezündet wurde/ da sieng sie an / Krümmet sich hin vnnd wider gleich wie ein Schlang/schnarchet/spürzet/plitz/vñ sprang



sprang in den Ketten/ daß die so an jr hielten/ vermeynten sie würd es alles allein/ ob sie dieses Liecht erlangen vnd auflöschen möcht/ zerreißen. Solches gab vielgedachter H. D. abermals Versach sie anzusprechen/ höre wie gehet es doch ewigklich zu/ daß du dich vnter allen Liechtern/ nur für vnd für nach diesem also reiffest/ vnd es außzulöschen vermeinst/ ist es doch nur meiner Mettenliechter eines / hierauff Antwortet der Sathan / D leng Pfaff leng/ meinst du ich wisse es nicht was es sey. Der H. D. so sage an/ was ist es dann/ aber er wolt lang nicht mit der Sprach heraus/ biß er doch zu legt dahin gemüßigt/ daß er bekenet/ es wär ein geweyhtes Liecht/ der H. D. wer hat es dann geweyhet/ nur geschwinde gib Antwort/ darauff der arge Schalck Bericht/ vnd saget/ dein Abgott vor welchem du niderfallest vnd ihn anbettest/ dise nichtige Antwort künde sme H. D. nicht vnuerantwortet lassen/ saget / O du Treu vnd Ehrloser/ verlogener Erzschalck/ du Scriffter vnd Erdichter aller Lügen vnd Kegeren/ du chust vnd redest hien innen/ gerad wie dein ganze Junfft vñ Bruderschaft/ die Ergreger / denen ist gleich wie dir / auff diser Welt kein grösserer Dorn in den Augen/ als eben unsere von GOTT vnd seiner Kirchen fürgesetzte/ höchste/ fromme/ Geistliche Obrigkeit/ höre wol/ wann mir derselben von wegen shres hochtragenden / heyligen Apostolischen Ampts/ als auff Erden Gottes Gewalthaber / Vicarier vnd Stadthalter/ alle Ehr vnd Reuerenz erweisen/ derer Geboten vñ Verbotten in aller Vnderthänigkeit willig gehorsamen / vns weder dich noch deinen vnfriedliebenden Anhang von der sichern Einigkeit/ diser heyligen Catholischen Apostolischen Versammlung



vnd Kirchen/ das allerwenigste nit/ vnnnd wann se vns  
 singet wie die Zeislein / lassen abwendig machen / son-  
 der was vom Anfang se vnnnd an allen Enden vnnnd  
 Orten/ der ganzen breiten Christenheit geglaubt wor-  
 den/ darbey bleiben wir / so muß dir vnd deiner plutz-  
 tigen Rott / solches Abgötterey seyn / so gelehrt vnnnd  
 erfahren erkenne ich dich Schalck / daß du wol weißest/  
 daß kein Creatur im Himmel vnd auff Erden/ so hoch  
 fromb vnnnd heylig dieselbig seye/ kan von vns / dann  
 allein der Allmächtig GOTT/ so da ist einig in der Gott-  
 heit vnd Dryfaltig in den Personen per Latriam ange-  
 bettet wirdt.

Er war ge-  
 lert / redet zu  
 zeit Latein.

Dise Frau  
 war damals  
 30. Jar alt.

Wie nun dises alles fürüber / die Erfahrung wie  
 es aller dings vmb dises ellende Weib beschaffen / leider  
 mehr dann zu viel eyngenommen / vnd gedachter Herr  
 Dechant sich dessen / daß auß einem Armen noch fremb-  
 den/ groben/ vngelernten/ gleich dreyßsig Järigen bäw-  
 rischen Menschen / die noch der zeit vmb vnser Reli-  
 gion vnd andere Ceremonien das wenigste wissens bet-  
 te / ob irer Aufslag vnnnd Wissenschaft nicht genugsam  
 verwundern kundte / vnd doch darbey sahe / daß alle  
 Mittel / mit welchen vormals eelichen geholffen wor-  
 den/ alle zu gering vnd gar nichts / wider einen so mächt-  
 igen/ gar woluerschanzten/ starcken Feind außzurich-  
 ten/ stellet er die Sachen auff dikhmals bis GOTT bes-  
 sere zeit vnnnd gelegenheit mit Genaden eyngebe. Al-  
 lein er Herr Dechant wolte von dannen nicht/ sie bettet  
 dann ehe mit ihme / aber was für ein ellendes kaltes  
 Gebett sie verbracht / das weiß GOTT vnnnd alle die  
 jenigen so mit vnnnd darbey gewesen / das heylige  
 Vatter vnser gieng zimlich von statten / da sie über  
 32

Wie sie sich  
 zum Gebett  
 geschickt.



an den Englischen Gruff / vnnnd die zwölff Stuck / des  
 heyligen / wahren / Christlichen Glaubens Kame /  
 allda waren der Lynfall vnnnd Entschuldigung so  
 viel / darnon nicht zuschreiben / dann inn Summa /  
 was GOTT den Vatter der vns erschaffen / Jesum Chris  
 tum / welcher vns erlöset / GOTT den heyligen Geist / ei  
 nen wahren Regierer / Lehrer / Tröster / Erhalter vnd  
 Patronen / der ganzen heyligē Christenlichen Kirchen /  
 vnd dan die in Ewigkeit gebenedeyten vnd hochgelob  
 ten Jungfrauen Mariam / welche edle Blum vns den  
 allerschönsten wolriechenden Samen / der diser Schlans  
 gen den Kopff zerretten / getragen hat / nur ein wenig  
 rüret vnd antruff / das wolt lauters nicht heraus / war  
 bitterer als Gallen / vnnnd bisse vbler dann Saltz in den  
 Augen.

Hierauff befalhe vielgedachter Herr Dechant / man  
 solte Tag vnnnd Nacht gar fleissig achtung auff viel er  
 melte Apoloniam geben / das sie nur nichts erwische /  
 damit sie ihr oder jemandes anders einigen Leibs schas  
 den zufügen köndte / batte auch ihre Benachbarten vnd  
 bestelte Warter / wie dann Tag vnnnd Nacht auß Brü  
 derlichem vnd Schwesterlichem mitleyden trewlich ges  
 schahe / lassen besolhen seyn.

Am nachfolgenden Montag vnd Freichtag / wurd  
 das arme noch in einem wie den andern weg tobende  
 Mensch / durch Herrn Dechant vnd andere Ehelic  
 bende Priesterschaft etlich mal besucht / aber nichts für  
 nemblichs vnd ernstlichs mit ihr gehandelt. Dann wolt  
 ermelter Herr Dechant / diese zeyt das sich ire Ehrwür  
 ad generalem confessionem soviel möglich mit allem  
 Fleiß preparieret / vnnnd mit dem / was dann zu einem  
 sol

Was am  
 Montag vñ  
 Freichtag ges  
 sehen.



solche spitziigen hochgefährlichen Handel die groß Tors  
turfft erfordert/ genug zuschaffen.

Ein junger  
Predicant von  
ersterbeu sich  
diesen bösen  
Feind außzu  
reiben.

Hiernon D.  
Staphylus  
in dem Nach  
truck fol. 154.

Noch einem  
Besuchen Me  
schen die Bi  
bel gar vund  
gib im zu es  
sen wirst nich  
tes außricht.

Gerad wie es  
den 7. Sont

Unter dessen begab sich / das ein junges Predig  
Künglein Joannes Perwein / allhie eines Kürschners  
Sohn/ welcher gleich also Nagelnew (ist anderst war  
was er selbst außgeben) von dem Newburgischen Exa  
mine hieher kame/ vund schon wie ihn gedunckt / volla  
mächtigen Gewalt/ wie der Dichter seiner leydigen Trau  
gedi/ Anno 1545. in der Pfarr Sacristey zu Wittens  
berg/ die Teufel von den Besessnen ein vnd außzutrey  
ben empfangt/ dieser wie er von seiner Mutter so gerad  
Geißlbrechts Hauß vber wohnt/ solchen Jammer er  
faren/ vns erlich mal ein vnd außgehen gesehen / auch  
wol vnter dem Volck in der Stuben gestanden / aber  
vor seinem grossen Bart/ darinnen all sein Kunst wie  
Samsonis Stärck steckt / ihn mit nicht kenne/ dieser  
gehet erlich mal in vnserm abwesen hinüber / vnd siehet  
wie jämmerlich vnd erbärmlich das arme Mensch/ von  
dem Seelmörder vund bösen Geist gequelet vund zer  
martert wirdt/ Spricht ihr zu / aber lieber GOTT auß  
seine todte/ krafftlose Wort wolt Hans nicht herauß  
gucken/ sonder der Böse hette sein lauters Affenspill mit  
ihme/ zu letzt fordert er der elenden Frawen Mann zu  
sich/ redet ihn an mit diesen Worten / mein lieber Hans  
Geißlbrecht / das ewere Bapstische Pfaffen ewerem  
Weib solten helfen künden/ vnd den leydigen Sathan  
damit sie gar hart behafft / von ihr treyben / geschicht  
nimmermehr / ist ihnen vnmöglich/ aber Ich/ sager der  
Küne Degen/ wolt noch einen Diener des Ministerij zu  
mir nemen/ vnd ihn mit dem klaren Wort Gottes auß  
reiben. Solches wurde vns durch gedachten Geißl  
brecht.



brecht geoffenbart / daß verdros alle Geistliche / vund  
 nit vnbillich / daß einer so allhie geboren / getaufft / con-  
 firmiert / confitirt / communiciert / vund erzogen wor-  
 den / dessen Vatter / Mutter vund Geschwister geten gut  
 Catholisch allhie gelebt / vnd zum theil schon gestorben.  
 Er aber allein darvon Apostatiert / dermassen daß wir  
 alle entschlossen / wann der Actus Coniurationis, wie er  
 dann auff Donnerstag / doch noch alles heimlich / ange-  
 stellt war / so heert er mit in die Kirchen gemüßt / vund  
 solten wir ihn gebunden / wie das arme Weisbildt / mit  
 hineyn geschlept haben / nicht das ihm etwas leyds solt  
 widerfahren seyn / sonder damit er gesehen / was dieses  
 für ein besorgsame grosse gefährliche Arbeyt / vund nit  
 wie er villeicht vermeynt / ein ding / als wann man den  
 Heingzen hinder dem Ofen herfür locket / aber er schme-  
 cket Feuer / wurd gewarnt vnd trollet sich ein weil zum  
 Thor hinauf.

Scenz Act.  
 19. ergan-  
 gen / also die  
 vund deinen  
 Ministrans  
 ten.

O lieber Pärwlein bleib nur mit deinen armē Leu-  
 ten daheimen / sey zu frieden / wir wollen / wann es vns  
 zeit gedunckt / disem armen Menschen mit Gottes Hilff /  
 Genad vnd Beystandt / dann sie / wie mir dich / deine El-  
 tern vñ Geschwister get selbst zu Zeugen fürwerffen / nit  
 die erste ist / sein wider helffen vnd zu recht bringen / daß  
 sollest du in Kürz erfahren. Aber einen guten Rath wöl-  
 len wir dir geben / an dem fürnemen Ort / da du dich fast  
 zwölff ganzer Jar als ein alter Parteckenhängst ent-  
 halten / allda haben zween Priester auß vns verganges  
 ner Zeit zuhandlen gehabt / hat ihnen ein guter Freund  
 daselbsten / allerley gelegenheit / vund lezlich gar den  
 Ort / in welchem die armen / ellenden / vnbesunnene vns  
 richtige Leute / in vnderschiedlichen Gemächlein ver-  
 wart /

Er heist wol  
 auch Pärw-  
 lein / ist aber  
 vnser der  
 Pärwlein Ge-  
 schlechts nit.



Manchem  
wer zuhelffe  
muß aber als  
vnsinnig ver-  
derben vund  
sterben.

Matth. 12.  
Luc. 11.  
Mar. 3.

Was sich  
am Mitwo-  
chen zugetra-  
gen.

wart/enthalten werden/ gewissen vnd sehen lassen/vn-  
ter denen vermeinten vnrichtigen armen Leuten/ habē  
wir/höre/ lauter befunden vnd erfahren/ daß derer et-  
liche nit natürlicher weys vnbesonnen / sonder wie dieses  
Weib/ so du gesehen/ warhafftig von dem Bösen beses-  
sen/allda gebrauch dich / vnd deines Ministerij Nitge-  
sellen ewer Kunst/ vnd lasset die von dem leydigen Sa-  
chan vbergwaltigten arme/ ellende Leut/ nicht also an  
Seel vnd Leib so jämerlich verderben vund ersterben/  
dann sie euch sonst als ihre Seelsorger an Jüngsten tag  
anklagen/ vund ewig Racht vber euch schreyen werden.  
Vns jne zu helfen/ solt es ein geringes seyn/ aber schreyt  
vñ tobt ihr also/ wie die Phariseer wider Christū/ wann  
wir dann vnsern/ daß euch in dem allerwenigsten nicht  
angehet/ was wurdet jr dann für ein Zettergeschrey ver-  
füren/ wann wir erst Falcem nostram in messem vestram  
alienam eynschlagen würden/ ihr solt/ wann ihr mit ew-  
rem klaren Wort Gottes/ an ihnen etwas fruchtbarli-  
ches aufrichtet/ nicht also/ wie wir von euch geschändt/  
sonder vber die Brucken zu Regenspurg gelobt werde.

Am Wirwochen den 24. Octobris besucher viel vnd  
obgedachter H. D. sambt anderer Ehrwürdigen Prie-  
sterschafft / dieses arme Wehribelein gar frü/ sahen an  
bermal den grossen Jamer/ daß Tag vund Nacht kein  
Augenblick / weder Rast noch Ruh / vund so gar kein  
Besserung zu hoffen/ sonder sich die Sachen nur jmer  
schäfftiger eynreissen wolt/ redet am wider heym gehen  
H. D. die andern seine Confratres an / Ihr meine liebe  
Herren/ diser Jamer solt einem billich sein Herz zerbro-  
chen/ wie wöllē wir die Sachen mit diesem armen Weibs  
bildt angreifen/ auff daß doch die liebe Seel behalten  
werē



werden möcht/ ich hab wie ihr zum theyl gesehen/ allerley zulässiger Mittel gebraucht/ aber noch wenig dartz mit außgericht/ die Ursachen ist aber/ daß sich dieses arme Mensch so gar hart dem verzweyseten Böswichte ergeben hat/ von ihr bringe man ihn nimmermehr/ allein beschweret muß sie werde. So ist aber dasselbig ein solche besorgsame Arbeyt/ die einē gewißlich den Angstschweiß austreibt/ hab noch immer gehofft es soll dahin nicht kommen/ aber wie dem allem/ dieweil es je nit seyn kan/ so wollen mir morgen Donnerstag/ die Sachen für die Hand nemen/ vnd dieses besessen Mensch in die PfarrKirchen zu vnser lieben Frawen bringen lassen: Gebew vnd hoff zu GOTT im Himmel/ er soll seinen Segen vnd ein genadenreiches glückseliges Sründlein/ darzu Väterlich vnd genädiglich verleyhen/ darmit dieses arme Mensch auß dieser grossen vnaußsprechlichen Pein vnd Marter entlediget werden möcht. Bitte liebe Herrn/ laßt sie euch in ewrem Gebett/ sonderlich in dem heyligen Göttlichen Ampt der Messe besolhen seyn/ dann ist sach/ daß mir sie wider erretten/ so haben mir vor GOTT mehr Nutz geschafft vnd Gutes außgericht/ als Alexander Magnus, der gewan vnd bracht die gangen Welt vnder sich.

Nun vernembt aber Wunder vber Wunder / als bald diese Reden heimlich vnd weit von Geißlbrechts Haus geschahen/ in einem Augenblick vernimbts der arge schalckhafftige Tausentkünstler alles / weiß daß man in dem Werck/ in Morgen außzutreiben/ auff daß aber dieser gefangene Vogel ihnen nicht widerumb entfliege/ vnderstehet er sich vns allen vorzukommen/ daß ach GOTT/ wer kan es beschreiben/ oder darvon genug

Der Kch  
weiß alles  
man redt.



Der Böß  
vermeynde  
dieses Weib  
umbjubrin-  
gen eh ihr ge-  
holffen wer-  
de.

Der Böße in  
Gestalt einer  
Natter.

sam nach Noturfft sagen/ was er für einen Jammer  
mit diesem Menschen angefangen/ dann vernembt an  
dem Mittwoch vnder der Vesper/ war die Not so  
groß/ daß man eylends den Herrn Dechant holet/ seine  
Ehrtwürd sollen vnuerzogenlich/ vnnnd nur geschwindt  
zu diesem armen Weibsbilde kommen/ dann es sey nit  
möglich/ wann man nicht helffe/ so werde sie der böse  
Feind zu tausende Stucken zerreißen/ wie gedachter  
Herr Dechant vnd vnser etlich kamen/ was mir für ein  
Jammer fanden/ gehet vns vnser lebenlang vor/ dann  
vngedacht/ daß dises mehr dann elende Mensch/ auff der  
Erden/ in einem elenden Bethlein an zweyen Ketten  
aufgespant/ daß sie kein Hand noch arm zu der andern  
bringen kundte/ lagen vnd hielten auff jedwederem  
Arm zwen Mann/ ihr Ehleiblicher Bruder saß ihr  
griechlich vber ihre Beyn/ etliche Weiber fielen ihr vber  
den Leib/ vermeinten sie nider zutrucken/ noch halff es  
alles niches. Der böse Feind pänmet vnd hebet es alles  
miteinander dermassen vbersich/ daß allwegen ein  
Mensch vnder irem Rucken her könnē hindurch schließ-  
fen. Vnd das/ welches an dem aller erschröcklichisten/ so  
sah vnd griffe man den bösen Feind zwischen Haut vnd  
Fleisch/ in Form vnd Gestalt/ wie ein gute/ dicke lange  
Nater oder Schlang/ geschwind wie sie von Natur auff  
der Erden laufft/ also behend lauffet sie in dem Leib  
hin vnd wider/ ein weil in den Kopff/ bald war sie in  
einem Arm/ dann in dem andern/ vrblichlichen in den  
Füssen/ vnnnd wo sie in dem Leib lag/ so war derselbig  
Ort so heysß/ brennet wie lauter Sewr. Letztlichē lauffte  
das Hertz wie ein zimlicher Sechserleyb auff/ vnnnd der  
böse Feind umbwindt vnnnd krencht vmb das Hertz her  
rumb



rumb / gleich als wann sich ein Tater umb einen Baum  
 schlegt / rittele vnd zeucht dasselbig ihr Hertz dermassen  
 zusammen / daß es alles anfieng zu krachen / vnd mir all  
 miteinander nicht anderst vermeynten / dann der grim-  
 mig / zornig / böse Geist hert sie schon aller dings erstocket  
 vnd vmbgebracht / dann an dem gangen Leib wolt sich  
 doch nicht ein äderlein mehr regen / der Herr D. schrye  
 vñ ruffet für vnd für zu GOTT im Himmel / sein Götlich  
 che Allmächtigkeit / die je viel stärker dann diser Mens-  
 chen Feind / wolte doch sein grundlose vnd von Ewig-  
 keit angeborne Lieb vñnd Barmherzigkeit an diesem  
 seinem Geschöpff erzeygen / vnd ihm dem grausamen  
 mörderischem bösen Feind wehren. Dergleichen vermas-  
 net er alle Umbstehende / daß sie bey GOTT dem HERN /  
 mit ihrem andächtigen flehenlichen Gebett starck an-  
 hieltten / ob doch ein frommes Mensch soniel bey GOTT  
 erwerben vñnd erbitten künde / darmit vns doch dieses  
 Mensch nicht also jämmerlich vnder vnsern Händen er-  
 morder würde / in dem thet man ihr den Wund mit eis-  
 nem Schlüssel auff / aber kein Leben wolt sich ein weil  
 mehr finden / bis man ihr etwas eingosse / da fieng das  
 Hertz wider an zu schocken / das gab vns allen widerum  
 einen Trost / hulffen vnd labenden all an jr bis sie wider  
 ein wenig gemüget. Alsbald gab Herr D. Befelch /  
 man solt ihr das Haar auff dem Kopff sauber hinweg  
 schneiden / dann es alles mit Blut vñnd anderer Vn-  
 sauberkeit vberunnen / ordnet auch ein Laugen dar-  
 mit solten ihr die Weiber sauber zwagen / Er der Herr  
 Dechant wolte gar bald wider kommen.

Darauff kompt Herr Dechant heym / erfordert zu Was für pen  
 sich / mich M. Sixtum Pärwlein seinen Brudern / Herren sonen Herr



Dechant bey  
sich gehabt.

Georgium Witmeyr seinen Confessarium, Herrn Bern-  
hardum Eisen / damals Diaconum / Wilibaldum  
Plettelinum Studiosum, so newlicher Zeit von Rom auß  
dem Teutschen Collegio kommen / vnd dann Leonhardum  
Agricolam Studiosum, erkläret vns den grossen  
Jammer / vnd ein mal sey gewiß / helffe man dem armen  
Menschen / vnd noch diesen Abendt nit / so bringe sie der  
böse Feind vmb / vnd wann sie tausent Menschen wert  
wäre: Darumben kömte nur ey lents / spricht Herr Dechant /  
mit mir / habt ein gutes vnuerzagtes Herz / vnd  
fürchtet euch nicht / es soll euch kein Leyd widerfahren /  
was die Totturfft erfordert / daß ihr mir in Exorcismo,  
als Et cum Spiritu tuo, oder Amen solt Respondieren /  
allda gebt fein sonderlich ihr Priester acht auff. Alß bald  
den gibt er dem einen Studioso vnder den Rock / was jme  
Dechant zu diesem Actu von nöten / gehet vnd führet  
vns erstlich in die Kirchen / vermanet vns allda ganz  
trewlich zum Gebett / damit GOTT DER HERR seinen  
heyligen Geist senden wölle / auff daß diesem bösen / vnd  
veynen / tyrannischen Wortgeist gesteuert werden  
möcht / spert das Sacrarium auff / vnd nimbt auß  
dem Viatico einen einigen heyligen Particul / legt den  
selben in ein Klein Corporal Tüchlein / vnd schenbt es  
auff den Leib hinein / zeucht den Chor Rock wider auß /  
vnd gehet in Form vnd Gestalt / wie vormals allwegen /  
wann er zu se gangen gepfleget mit vns dem Hauß zu-  
hebe aber der Herr Dechant gar dem Hauß zu nahe /  
hebt der vnreyn Geist so viel Menschen gehört / an vnd  
schreyt / Au weh / Au weh / Au weh. Darauf fragten  
ihre Warterin / Appel was ist dir: Antwortet der böse  
Feind in ihr / Des kömpt ein stärkerer dann ich bin / wie  
nun.

D. nimpt by  
H. Sacra-  
ment zu sich.



nun der Herr Dechant dem Hauß zugienß / befalhe er dem / so die andern seine Rüstung trug / er solt darmit in dem Tennen / biß auff weitem Bescheyd warren / gehet hinein in die Stuben / Entet neben das arme Mensch auff die Erden nider / leget sein Hand wie er allwegen pfleget ihr auff den Kopff / sprach dem armen Menschen zu / aber das vorig alte schänden wolt gleich widerumb angehen / in dem greiffte Herr Dechant daß es kein Mensch mercket / in seinen Busen / zeucht er das Corporal mit der allerheyligsten Hostien heraus / vnd vnder seiner Hand legte er ihs auff den Kopff. Alß bald nur das Haupt dessen empfinde / thut sie in dem Beth drey grosser Schützer vber sich / saget Herr Dechant Apitel wie ist dir / thu ich dir dann aber mit meiner Hand weh / wie geht es zu / ein mal kanstu dieselben leiden / das ander mal nit. O ja saget sie / die Hand künde ich wol leiden / allein das / so du vnder der Hand hast / das thu herab / sonst wirfst du mich eben gar vmbbringen / das wolt GOTT nit saget Herr Dechant / sonder ich wil dich mit der Hilff Gottes eh lebendig vnd gesund machen / dann vmbbringē / zeyge an / was ist auff deinem Haupte. Sie halt / peit ein weile / Der Herr Dechant / nun muß es nur seyn / wissens wil ich haben / was sezunder auff deinem Kopff ligt / der böse Feind / Ey Ey Ey daß du mit mir also vmbgehest / wil ich dir nicht schencken / vnd solt es tausent Jar anstehen. O saget Herr Dechant / nach diesem deinem erdwen frag ich gar nichts / GOTT vnd seine heylige Engel wissen mir wol vor dir Schutz zuhalten. Sage darfür nur fluchs heraus vnd mach nicht viel Eramangens / was ist es? Es ist ein Tüchlein / halt saget Herr Dechant / ich muß dir den Kopff ein wenig mit

Böse Feind  
klagt / es kom  
ein stärkeren  
dann er.

Das 5. Sac  
rament tunc  
der Böß nicht  
leiden.



Die All-  
mächtigkeit  
Gottes zwin-  
get den Bö-  
sen die War-  
heit zuzagen.

diesem Tüchlein reiben/ O hör auff ich wil es dir alles  
sagen/ Was ist es dann? Der Böse/ Des ist das Heylig/  
der Herr Dechant/was für ein Heyliges? Der Böse/ O  
ich weis vnd kan es je nicht nennen/ der H. D. Eurgumb  
die gangen Nacht Kom ich von dir nicht hinwegt. Ich  
beschwör dich bey der heyligen Zukunfft Christi/ bey  
seiner heyligen Geburt/ vnd nach einander/ aber er wolt  
kein Antwort geben/ da H. D. aber dahin kam vnd  
sprach/ so beschwöre dich bey dem Creutz/ vnschuld-  
gen Tode/ Leiden vnd Sterben vnsers HERRN Jesu  
Christi/ daß du vor jedermieniglich frey herauf sagest/  
was es sey. Antwortet er/ Des ist halt das Heylig hoch-  
würdig Sacrament/ der ware Leib vnd Blut Chri-  
sti/ wie saget der H. D. Glaubest du dann auch / daß in  
dem Heyligen Sacrament des Altars/ der ware Leib  
vnd Blut Jesu Christi gegenwertig da sey? Antwort  
der Böse/ O was sagest du/ lasse mich zufriden/ wann ich  
es gleich nit glauben wolt/ so dringet mich doch die groß-  
se gegenwärtige Krafft vnd Macht Gottes darzu.  
Nach diesem fraget ihn Herr D. Wieviel seynd der heyl-  
ligen Particul oder Hostien auff dem Kopff? Antwort  
der Böse. Drey/ Herr D. O Schalck wol kommest du  
mit der Wahrheit so vngern herauf/ Er/ so du es je wis-  
sen wilt/ es ist ein Einzige/ Herr D. Das ist war. Aber  
noch eines wil ich Wissens haben/ ob du allein seyst oder  
sonst noch mehr Gefellen bey dir habest. Ich bin allein/  
saget er. Wie heissest du mit Namen? Der Böse ich heis-  
der Spielstuck/ O das ist nicht/ du hast mir vor niemals  
zum aller ersten die rechten Wahrheit gesage/ hab es all-  
wegen mit Gewalt von dir bringen müssen / also alda  
auch wil ich deinen rechten Namen schon von dir bring-  
gen/



gen/dann den muß vnd wil ich wissen. Also gieng es wi-  
 derumb an ein beschwören/ biß so lang vnnnd das er ge-  
 trungen war/vnd saget/er hiesse Schwam/darauff hu-  
 ben ihre Warter vnnnd Warterin an: O das ist warlich  
 sein rechter Nam/dann für vnd für hat sie ihme also ge-  
 ruffen vnd geneunt. Hierauff sieng Herr D. an/wolan  
 so getraw ich GOTT in dem Himmel/ mir wöllen den  
 Schwammen jezund bald nemen/ vnd dem Lucifer in  
 die Höllen hinunder schicken/ daß er seine Schuch dar-  
 mit wüschē/ der Böse/ D nit/ D nit/ verschon mein/ dar-  
 auff ruffte mir M. Sixto mein Herr Bruder/ ich solte  
 hin zu tretten/vnd das Corporal mit dem hochwürdi-  
 gen heyligen Sacrament/auff dem Kopffhalten/vnd  
 befalhe/ darob doch manichem schauet/ man solt alle  
 Ketten auffschliessen vnnnd hinweg legen/ ließe ihme sei-  
 nen Chor Rock/ Stol vnnnd Bücher herein bringen/ les-  
 getes an/vnnnd wie das arme Mensch aller Band ledig  
 gemacht war/nam er ein alte/rote Stol in seine Händ/  
 vnd sprach: Siehe Schwam/ jezunder kom ich zu dir in  
 dem Namen GOTTES/ deß Vatters ✠ deß Sohns ✠  
 vnd deß heyligen Geistes ✠. Dieses dreyfaltige/vnauff-  
 lößliche Göttliche Band/soll dich jezunder in Abgrund  
 der Höllen hinab binden/ daß du nimmer mehr in Le-  
 wigkeit/weder Leuten/Vtehe noch keiner einigen Crea-  
 tur weder schädlich noch schad seyest/nam ihre beyde  
 Händ/vnd wicklet jr die Stol zu dreyen malen darum-  
 ben/vnd gebot dem Bösen/bey der grossen Krafft vnd  
 Würdigkeit/dessen so auff deß armen Menschen Kopff  
 läge/ daß er sich aller weitem Ungestümigkeit ent-  
 halten wolt.

Dieser böse  
 Feind hat  
 Schwam ge-  
 heißen.

Als man die-  
 sem bösen  
 Feind von  
 der Höllen  
 troet hebt er  
 an zu zittern

Nach solchem wendet sich H. D. gegen dem Volck/  
 dessen



dessen ein solche Wänig/das Stuben/Dennen/Fenster  
vnd Gassen alles vol stunde/redet zu ihnen dieses In-  
halts.

Vermanung  
zu dem bey-  
stehenden  
Volk.

Ir geliebten in Christo dem HERRN/wie ihr allhie  
versamlet seyt/sehet/betrachtet vnd führet zu hertzen/  
was mir allda für einen elenden Spiegel vnd Anblick  
ligendt haben/dardurch je billich aller Gottlosen sün-  
digen Menschen Hertzen/wann sie so verhöret vnd ver-  
stockt/als nimmermehr kein Riselstein oder Ada-  
mant seyn kan/zu warer Busfertigkeit vnd bösserung  
ihres sündlichen Lebens/solten erweycht werden. Da-  
mit aber diese arme Seel GOTT dem HERRN wider-  
umb gewinnen vnd auß dem hindersten Rachen der  
Höllengerissen werden wöcht/hab ich/als leyder ein  
armer Werkzeug Gottes/mich mit Hilff vnd Bey-  
standt vnser geliebsten/einigen Helffers/Heylandes  
vnd Seligmachers Jesu Christi/auch in Krafft seines  
im Heiligen Sacrament gegenwertigen Fleisch vnd  
Bluts/GOTT dem HERRN zu preiß/seinem heiligen  
Namen allein zu Lob vnd Ehr/vnd dann euch allen  
zum sichtbarlichen/greifflichen Kenn vnd Werkzei-  
chen/wo vnd in was Kirchen/Christenlicher gemeiner  
Versammlung man bey soniel Ketzerreyen vnd gang ge-  
fährlichen letzten Zeiten/die rechten volmässigen Ge-  
naden/würckenden Krafft des lebendigen gang tröst-  
lichen Wortes Gottes/vnd seiner/in seinem Blut/Cons-  
secrirtten heylsamem Sacramenten Augenscheinliche/  
sichtbarliche/empfindliche Früchten suchen/vnd auch  
derer im fall der Not wider allen Anlauff des leydigen  
Sathans gebrauchen solt/ein grosses Werck/dessen  
wisse GOTT in dem Himmel/wann die Not nicht also  
groß



groß/ ich lieber wolt vberhaben seyn/ in ewrer Segens  
wertigkeit zuerrichten fürgenommen.

Derhalben bitt vnnnd vermahne ich euch all mit ein  
ander vmb Gottes willen/ jr wöllet auß Brüderlicher  
vnnnd Schwesterlicher Lieb vnd Mitleiden/ euch den  
grossen Jammer/diesen elenden Menschen/ so ihme je  
nimmermehr selbst darauß helfen kundte/ lassen zu  
Herzen gehn. Dieselben ewre Herzen in warer An  
dacht zu GOTT dem Vatter/vol aller Barmherzigkeit  
vnnnd Trostes gen Himmel auffheben/ demselben mit  
ewrem auß dem Herzen in rechtē Glauben vertrauen/  
warer Andacht/ herflüssendem Gebett trewlich anruft  
fen/ daß GOTT vnser Himlischer Vatter/ nicht vnser  
vnd dieses armen Menschen Sünde/ sonder die Blut  
flüssende für vnd für vmb vnsern willen/ offenstehende  
Wunden/ den aller herbsten bittersten Todt/ vnschuld  
diges Leiden vnd Sterben/ seines aller geliebsten So  
nes Jesu Christi vnser HERRN/wölle anschawen/vnd  
vns zu diesem Werck senden die einigen tröstlichen mit  
helffende Krafft/Wacht vnd Stärck/GOTT des heyl  
ligen Geistes/damit also in dem Namen Gottes/vnd  
in dem Glauben Gewalt vnnnd Macht seiner einigen  
heyligen Catholischen Christenlichen Kirchen/dieser in  
Ewigkeit verfluchte böse Geist/ von diesem Geschöpff  
Gottes außgetriben/vnd ein reiner Tempel GOTT des  
heyligen Geistes werden möcht. Solches vmb den All  
mächtigen Ewigen GOTT zuerlangen/so kniet mit mir  
nider/ vnnnd bettet ein andächtig Vatter Unser vnnnd  
Aue Maria.

Nach verrichtem heyligen Gebett/ordnet der Herr  
Dechant vns Studiosos so er allein zu Handreichung  
L. ij mit



mit genommen/ stellet vns vmb das elend Weib herumb/ gibt einem das Buch/ dem andern das Liecht/ vnd dann einem jeglichen was jme zu diesem Handel bey der Hand zu haben von nöte/ vnd fangt in dem Namen Gottes einen solchen herrlichen/ heyliger Göttlicher Schrifft gantz vberaus wolgegründtē modum Coniurationis, mit einem solchē Fleiß vnd Ernst an / wie er dan̄ hierzu ein lauters starckes vnuerzagtes Lewēherz hat/ daß vnser einem das Hertz zu zittern/ vnd die Haar gen Berg zugehn anfiengē. Wie nun derselbig herrlich Exorcismus ein gute Zeit geweret/ der böse Feind nichts sonderlichs mehr gepoldert/ allein ein Bab pleckt die Zän zum Fenster hinein/ begeret er/ man solt ihm dem Bui

Der Sathe  
het einem bö  
sen Zuben die  
Zän gern ein  
gestossen.

ben die Zän lassen einstossen / aber dieses sein Begeren wolt nicht statt haben / vnder dem Actu haben die vmbstehenden Leut/ welche bössers dan̄ vnser einer/ so mehrers zuthun gehabt augenscheinlich gesehen / daß ihre der Geißlbrechtin Augen/ so von Natur schwarz/ aber in diesem Elend Graw vnd Fewrig wie Katzen Augen worden/ widerumb allgemach ihre natürliche vorige Farb/ vnd an ihre rechte Ort/ dannes alles verwendet/ vnn̄d ihr lebliche Farb / Gestalt vnn̄d Natur / so sich alles verendert gehabt/ widerumb sein frisch daher gegangen/ bezugen vnn̄d becheuren es etliche so darbey gestanden hoch / daß sie vnder dessen einen schwarzen Vogel in Gestalt einer Ambfeln/ auß irem der Frawen Maul herauß haben fliegen gesehen/ das geben wir/ die wir weils vnser keiner gesehen für keine Warheit auß/ dann mir mehr Berichts nit/ dann souiel mir mit vnsern Augen gesehen/ vnd in dem Fall der Not/ bey vnsern Priersterlichen Würden vnd höchstem Lyd vnn̄d gutem Gewissen

Etliche Bey  
stehende sagē  
sie haben einē  
schwarzen  
Vogel sehen  
herauß fliegē.



wissen genungsam becheuren können/ geben wollen.

Wie nun dieser Actus aller Ding glücklich vnd wol  
 (GOTT sey gelobt) verrichtet/ gedachte Apel die Hände  
 zusammen zuschlagen anfieng/ neyget sich Herr Dechant  
 zu ihr nider/ thet ihr die Strol von den Händen/ fraget  
 sie vnd sager: Liebe Apel/ wie gehabest du dich jezums  
 der/ Kennest du mich/ vnnnd die Leut widerumb: Also  
 wil das entlediget Mensch vor Frewden/ das machet  
 manches nasses Aug/ in dem Bethlein auffspringen/  
 vnd dem Herrn Dechant umb den Hals fallen/ aber die  
 Glieder vnd der ganze Leib war aller so gar hart zer  
 rissen/ das sie souiel Kräfften nicht haben möcht/  
 fangt an/ schlegt ihre Hände ob dem Kopff zusammen/  
 Siehet auff gen Himmel vnd schreyt zu dreyen malen.  
 O Allmächtiger Ewiger GOTT/ dir sey Lob Ehr vnnnd  
 Preyß in Ewigkeit/ das du mir armen grossen Sündes  
 ein/ auß dieser vnglaubigen/ schweren Pein vnd Mar  
 ter so Väterlich geholffen. O GOTT verzeyhe vnd ver  
 gib mir das ich so hart vnd schwer wider dich gesündi  
 get hab. O HERR jezunder wil ich gern sterben/ allein  
 lass mich nur vor meine grosse Sünde beichten vnd all  
 hie abbüssen. Nimbt dem Herrn seine Hand/ küßet vnd  
 schmaget ihm dieselben lang vnnnd spricht: O Herr wie  
 kan ich die Barmherzigkeit/ Lieb/ Ehr vnnnd Trew/  
 so ihr an mir armen erzeigt/ die Zeit meines Lebens  
 widerumb gegen euch verschulden vnnnd verdienen/  
 GOTT bezale es euch/ mir ist es vnnmöglich. Antwortet  
 ihr Herr Dechant: Liebe Apel/ alle Müh vnd Arbeit/  
 so ich/ auch andere fromme Leut an dir gethan/ rewet  
 vns gar nicht/ GOTT sey gelobt in Ewigkeit/ das dir wis  
 derumb geholffen/ dann du bist wol so ein armseliger

Apel wurde  
 vom Bösen le  
 dig wil vor  
 Frewde dem  
 H. D. umb  
 den Hals fal  
 len.



Apel sage an  
diesen Schwä-  
men zuverflu-  
chen.

Apolonia  
vermanet ih-  
ren Mann  
zur Bösse-  
rung.

Wensch gewesen/ jezunder küsstest du mir meine Händ/  
vor einer einigen Stund wolt ich nit hundert Gulden  
genommen haben/ daß ich dir also gehalten/ dann du  
wurdest mich wol vbel zugericht haben. Fange sie an: **D**  
du in Ewigkeit verfluchter Schwam/ wol hast du mich  
halt betrogen vnnnd in ein Bad geführt/ wisse **GOTT** in  
dem Himmel Herr Dechant/ saget sie/ von der Stund  
an da er mich besessen/ hab ich anderst nicht vermeynt/  
dann ich sey in einem solchen Wolleben vnnnd lustigen  
Ort/ dergleichen die ganze Welt nie gehabt/ noch ge-  
sehen. Aber wiewol ich gelebt/ das empfinde ich jezun-  
der an meinem ganzen Leib/ vnnnd siehe es dorten an  
den vngheuren ligenden Ketten wol. **O** lieben Leut/  
redet sie zu dem Volck/ Nembt euch ein Exempel an  
mir armen Weibsbildt/ werdet fromb vnnnd Gotts-  
fürchtig/ dann daß ich vnd mein Mann so vbel mit ein-  
ander gelebt/ sehr geflucht vñ gescholten/ hab ich diesen  
grossen Strandt erstehen müssen. **O** Hans/ schry sie/  
nach irem Mann der saß hinder dem Ofen/ wo bist du?  
Kom hieher mein lieber Hans/ vmb des jüngsten Ger-  
ichts willen bitte ich dich/ fluche vnnnd sey nimmer so  
häßtig wie vor/ dann daß ich in diese grosse Noth kom-  
men/ ist allein/ daß mir so Gottlos miteinander gelebt  
die Ursach/ dir sey alles verzigen vñ vergebē/ verzeyhe  
mir auch wo ich wider dich gethan / darauff geben sie  
beyde einander die Händ vnd weinenden bitterlich mit  
einander.

Als dieses vollendet/ fraget sie **H. D.** Liebe Apel  
vermeynst du aber/ du seyest aller dings von dem bösen  
Feind ledig vñ loß/ empfindest keiner Anfechtung oder  
sonst etwas Böses mehr? **O** Herr/ Ant. Apel nit ein ei-  
niges



niges Dinglein/sicht mich auff dieser Welt mehr an/ ihr  
seyt in ewrem Gebett nit vil vber den halbe Theyl Kom-  
men/da ist der verzweyfelt Böswicht hinweg? O Herr  
saget die Entledigte da jr vor seyt herein gangen/ vnd  
nur die Stuben thür auffmachtet/ O wol so ein schöner  
Glanz fiel von euch auff mich/da erkennet ich mich ein  
wenig/mercket vñ wuste das jr das h. hochwürdig Sa-  
crament bey euch hette/ vñ war willens ich wolt schreye  
en/ O Herr hilff/aber von stundan kam der verzweyfelt  
Schelm vnd leget sich wie ein Zentner Stein auff mein  
Zungen/ vñnd wurd aller meiner Vernunfft wider be-  
raubt.

Ist ihr auff  
der Zungen  
wie ein zent-  
ner Stein  
gelegen.

Die weil dann/ redet Herr Dechant Liebe Apel/ dir  
der Allmächtig GOTT durch sein grundlose Genad vnd  
Barmherzigkeit widerumb also vätterlich geholffen/  
vnd du auß deiner grossen vn menschlichen Pein/ Wars-  
ter/ vnd von dem leydigen Wieterich dem Sathan ent-  
lediget worden/ solche dir von GOTT erzeigte Woltha-  
ten/kanst du GOTT nimmermehr darumben/ vnd wann  
du dein Lebenlang auff deinen Knien giengest genug  
dancken. Dann da Christus der HERR den Lazarū auß  
dem Grab/der Witfrawē Son vor der Statt Naim/ Ioan. 11.  
vnd dan des Jairi Tochterlein/ so alle gestorben gewe- Lucz 5.  
sen/ widerumb durch seine Göttliche Allmächtigkeit Matth. 9.  
aufferwecket/ das halten wir Christglaubigen Men-  
schen/ vnd nit vnbillich/ zur Bestertigung vnser heylis-  
gen Christenlichen Glaubens/ vñnd dann vnserer auch  
künfftigen Aufferstehung für/wie sie dann in der War-  
heit seynd grosse Wunderwerck/ aber das so GOTT der  
HERR jezunder auß lauterer Genad vnd Barmher-  
zigkeit erweisen/das ist noch grösser: Versach/du bist gau-  
me



mit Seel vñ Leib in dem Tod dinnen also tieff verstorben gelegen / das / wann du in diesen deinen Sünden deß Unglaubens vnd der Verzeiwlung gestorben / so herrest du keinen Theyl an Gottes Reich nimmermehr in Ewigkeit zugewarten gehabt.

Diesem allem nach so bedencck nur / wer vnd wo dir geholffen worden / so befindest du daß es GOTT allein / vñnd in seiner mir vertrawten Gesponsß der Heyligen / Allgemeynen / Catholischen vñnd Apostolischen Kirchen / außserhalb welcher kein Heyl noch Seligkeit nimmermehr zusuchen / gethan. Ist es dann / wie die ganz Welt / wann sie allda stünde / vñnd diesem Handel vom Anfang bis zum Ende zugesehen vñnd beygewohnet hette / bekennen müste / ein sonders Werck Gottes / so sage ime darumben Lob / Ehr vnd Preiß / alle die Tag deines noch vbrigen Lebens / bleib vñnd verharre vñnd mehr dein lebenlang in der Mutter schoß vñnd Gehorsam dieser heyligen Christenlichen Kirchen / in welcher dir durch Gottes Genad vnd Güte diese Barmhertigkeit widerfahren vnd erwiesen worden / hebe auff dein Herz in rechter Andacht vnd bette mit mir das heylige Vatter vnser / Ave Maria vñnd den Christenlichen Glauben. Nach diesem säget Herr Dechant / hab von gangem Herzen Reu vnd Leyd vber alle deine begangene Sünde / sonderlich daß du von GOTT deinem Erschaffer / von Jesu Christo deinem Erlöser vnd Seligmacher / so weit abgefallen. Bezeichne dich derhalben mit dem Zeichen deß heyligen Creuzes vor allem fernem Anlauff deß bösen Feindes / vñnd sprich mir nach mit Mund vñnd Herzen die offene Schuld. Wie sie nach beschehner offner Schuld Professionem fidei Catholice

Wir mücht  
leide die gāg  
Welt / vñnd  
sonderlich vn  
sere Widers  
sacher hetten  
zugesehen.

Apollonia  
war damals  
noch nie Ca  
tholisch.



tholica auch gethan / wurd sie ab Hæresi absolutert.  
 Nam Herr Dechant das heylig hochwürdig Sacra-  
 ment von ihrem Haupt/ther das Corporal auff / nam  
 die allerheyligsten Hostiam in seine Händ/vnnd sprach  
 Sihe liebe Apel/sezunder will ich dir dessen gebenedey-  
 ten Fleischs vnd Blut:ja sein Gegenwertige ganz voll-  
 kometliche Seel Gottheit vnnd Menschheit/ so dir auß  
 deiner Pein vnd Marter hic zeitlich vnd dorten Ewig-  
 klich geholffen/zeigen/vnnd dich auff dieses mal allein  
 Geistlich damit speisen: Sprich derhalben in rechter des  
 mütiger Andacht/mit dem Euangelischen Hauptman.

Matthæi 8.  
 Luca 7.

D HERR ich bin nicht würdig daß du eingehest vnder  
 mein Dach/sonder sprich ein Wort/ so wirdt mein Seel  
 gesund. Als jr das heylig hochwürdig Sacrament ges-  
 zeigt/vnd sie sambt allen Umbkntenden demselben als  
 Gottes gegenwertigen Sone selbst alle gebürliche Ehr-  
 vn Xenerenz gegeben/wurd dasselbig widcrum in das  
 Corporal gelegt/hielt es H. D. in seinen Händen/wens  
 det sich gegen dem Volck vnd ther zu ihnen ein Verma-  
 nung/vngefährlichen dieses Inhaltes.

Jr Andächtige Christi des HERN. Welche diesem  
 Handel bis zu dem Ende beygewohnt/vnd mit ewigen  
 Augen selbst geschē/wie der Allmächtig/Ewig/Gütig/  
 Gerechtw/Barmhertzig vnnd Gerechte GOTT (so nim-  
 mermehr in kein Vbel verhenget oder geschehen lieffe/  
 wañ er durch seine Görtliche / vnersorschliche Weißheit  
 vnnd Fürsichtigkeit nit wuste vnnd erkennete/ daß vns  
 etwas guts darauff erfolgete ) dieser gegenwertigen  
 Weibs Personen widerumb so wunderbarlich vber ma-  
 niches Sinnen/gedencken vnd verhoffen geholffen. So  
 habte euch allmiteinander auß Gottes Wort wol zu

Die ander  
 Vermanung  
 nach verrich-  
 ten Sachen  
 zum Volck.



berichten vnd dessen zuerinnern/das/da Christus vnser  
 lieber HERR vmb vnserer Erlösung willen in Menschli-  
 cher Natur/ auch seine Liebe Außervöleten Apostel/  
 vnd dann andere Freund vnd Diener Gottes noch dieses  
 Elend gebawet/ auff Erden gangen/ vnnnd dergleichen  
 Wunderwerck/ als/ an Krancken/ Besessenen/ gar Ver-  
 storbnen geihan/vnd auß Gottes Krafft gewürcket/les-  
 sen vnd hören wir/das die Menschen so solches gesehen  
 mit vnnnd beygewesen ( außgeschlossen diejenigen so der  
 Teufel mit Vnglauben so gar hart verplende vnd ver-  
 stockt gehabt ) allwegen ihren Christenlichen Glauben  
 dardurch gestärckt / jr sündliches Leben an jnen selbst  
 gebößert / vnd dann Gott dem Herren vmb solche er-  
 zeygte Wolthaten Lob/ Ehr vnnnd Preiß von Grunde  
 jres Hergens gesagt. Eben gleichmessiger Gestalt sol-  
 let vñ müßet jr euch almitteinäder/ jezunder in diser vns  
 an dieser Weibs Person erzeugten genadenreichen Guts-  
 thatē verhalten/ ewren waren/vngesellschafteten/vngeserb-  
 ten/Catholischen Glauben damit stärcken/darinnen bis  
 an ewer letztes Ende Mäulich / Ritterlich streitten vnd  
 standhafftig verharren/ euch den Teufel/vnd wann er  
 sich gegen disen letzten Zeiten/ noch so schwarz wild vnd  
 mausig machet/das aller wenigste nit lassen jren/ son-  
 der dieses zum Fundament ewrer Religion setzen/das  
 vnser Heyliger Christenlicher Catholischer Glaub / ans  
 fänglich von dem H. Apostel Petro dem Fürsten vnnnd  
 Primaten aller Apostel vnnnd Obersten von GOTT ge-  
 ordneten Verweiser / Statthalter / Obristem Erzbi-  
 schoue der ganzē Herd vnd Schäflein Jesu Christi/ die  
 er ihme durch sein allerheyligstes tewres Blut hoch er-  
 kaufft/nit auff ein Primat Person/Genssedem/Dinten/  
 Papier



Papier/ oder auff todte bloße Wort/sonder auff einen  
 fōsten starcken vnbeueglichen Selsen/ das ist/auff Chris-  
 tum Jesum des lebendigē Gottes Son selbst/ jme den Pfal, 30.  
 Namen seiner jme vertrauten Kirchen/ an vnser aller  
 Statt gebawet vnd so starck fundieret / daß alle Pfor-  
 ten der Höllen den in Ewigkeit nicht sollen können noch  
 mögen vbergewältigen/nach mit aller irer Macht wie  
 viel sich daran versuchen werden/ können vmbstossen.  
 Für eins.

Zu dem andern/ so gehet auch in ewer selbst eygens  
 Gewissen vnd erforschet mit fleis/wie jr gegen Gott ewe-  
 ren Nächsten vñ euch selbstestehet/befindt jr dann/wie  
 leyder diser Zeit aller Prediger vnd Seelsorger höchste  
 Klag ist/ daß ihr GOTT den HERRN mit ewrem groß  
 sündlichen Leben schwerlich erzürnet/ewren Nächsten  
 beleydiget/demselben nicht auffrecht vnter Augen ganz  
 gen/ vnd dann ewer selbst Seel vnd Leib mit mancher  
 ley Sünden besleckt vnd verunreyniget. So ist kein an-  
 derer Raht/dañ allein folget der getrewen guten Lehr  
 des Königlichen Propheten Dauids/da er allen Sün-  
 dern in das Ohr schreyt vñ spricht: Declina à malo & fac Matthei 16.  
 bonū &c. Stehe ab von dem Bösen vñ thu Guts. Habt  
 in dem Herzen drinnē da sich alle Sünde anfangē Rew-  
 vnd Leyd/beichtet vnd bekenet dieselben/in solchem be-  
 reuitem Herzen mit dem Mund/den hierzu geordneten  
 Dienern/ so an Gottes Statt euch die Sünde zuuerzei- Ioan, 20.  
 hen Macht vnd Gewalt haben. Neme vnd setze jme als  
 dan ein jeglicher starck für/er wolle sich hin füran mit der Ioan, 15.  
 Hilff vñ Genad Gottes ohne die mir nichts vermögen/  
 bößern/ fromb vnd Gottsförchtig werden. Vnd was  
 zum letzten GOTT der HERR durch mich seinen aller vns



H. D. bitte  
man soll in di  
sem allein  
Gott die Ehr  
vnd ihme gar  
nicht geben.

Matth, vlt.

Iob 14.

würdigste Diener an diser Person gethan/alda bitte ich  
euch almiteinander vmb Gottes willen/jr wöllet weder  
mir noch jemandes anders einigen Ruhm nit zumessen/  
sond Gott dem Herrn/der durch sein einige Gnad alles  
in allem würcket/sime von grund ewres Hergens/Lob/  
Ehre vnd Danck sagen / das dannoch der Allmächtig  
ewig GOTT vns armen Kindern Lue/einen solchen star  
cken Helffer in die Welt gesandt/der auch bey vns in sei  
ner Kirchen bis zu dem Ende der Welt zubleiben zuge  
sagt/der den grausamen erschrocklichen grossen Gewalt  
des Sathans/welcher Gewalt/wie Job sagt/vund ge  
wislich er selbst wol erfahren / vber aller Menschen Ge  
walt ist/dannoch dempffen vnd vnder seine Süß treten  
kan. Demnach kniende mit mir nider vund bettet GOTT  
zu Lob vund Danck mit Andacht ein Vatter vnser vnd  
Aue Maria.

Ander  
Klender wur  
den benedi  
ciert.

Nach verrichteter Dancksagung/gab H. D. jrem der  
Apolonia Bruder Befälch/er solt seiner Schwester an  
dere Kleyder auß der Truhnen herein bringen/ aber du  
lieber Gott er hette gerad den Rock darinnen sie anfäng  
lich in disen Jammer Kommen/erwischt/ als bald sie den  
ansichtig: D fluchß schrey sie/mir disem hinwegt/ dann in  
disem Rock ist es mir widerfahren/ wie ein anderer ges  
bracht/vnd wie es die Noturfft erfordert/durch H. D.  
benediciert wurden/befalhe er H. D. den Weibern/wan  
die Männer hinwegt/soleen sie jr die alten Kleyder alle  
auß/vnd mit diesem anziehen.

Nach dem nun alles verrichtet / gesegnet H. D. die  
Apoloniam/vermanet sie zu warer Beständigkeit zum  
erewlichsten/vnd das sie sich nun hinfüran das aller wes  
nigste nit mehr wolt betriben noch anfechten lassen/son  
der



der Gott dem Herrn festiglich vertrauen/auff in bawen/dann hab Gott der Herr der Seelen geholffen/so wurde er auch Krafft vñ Macht darstrecken/damit der zermartert Leib/widerum zu seinen vorigen Kräfften kōmen wurde/damit sie ihre Sünde volkōmenlich nach erlangter Gesundheit beichtē/das H. hochwūrdig Sacrament des waren Leib vñ Bluts vnser Herrn Jesu Christi empfangen möcht. Auch alsbald es mit ihr böser worden/vñ das sie zu Fuß vber Land reysen künde so müste sie Gott dem Herrn zur Dancksagung ein Wallfart von hie auß Pausus gen Berbrun zu S. Saluator thun/dann dahin sey sie durch ihn H. D. mit einer zwis pfündigen Wachskerzen verlobt worden. Dieses alles verlobt war ihr von Herzen wol vermeynt/schied also H. D. von ihr ab/vñnd trug das H. Sacrament wider in die PfarreKirchen an sein gewonlich orth/vnd siengen alda mit einander das Te Deum laudamus mit freuden zu singen an/Lobeten Mariam die Mutter Gottes/vñ sere bey irem lieben Sone IESV CHRISTO getrewen Fürbitterin mit dem Salue Regina, theten zu Gott vnser Gebet/vnd begaben vns zu hauff.

Apollonia  
wird gen  
Saluator  
verlobt.

Vnd ist also zum beschluß die Allmächtigkeith Gottes hoch zu preysen/dann ob gleichwol nit weniger/das solches Weibsbild auß allem oberzelten Jamer/da sie in vier ganzen tagen vnd nächten ein solche marter vñ pein erlitten/auch der gang Leib vnd alle Glieder dermassen zerrissen gewesen/das wann die aller vnbarms herzigisten Nachrichter ob ir gestanden/noch hetten sie dieses arme Weib mit aller peinlichen Tortur nit vblev zurichten kōnen/gedoch hat der allmächtig GOTT durch seinen Segen/ir so viel Genad vnd Gesundheit mitgetheilt.




40 Warhaffte Geschichte Austreibung eines Teufels.  
 theilt / daß sie Sambstags in dem Eingang des Ad-  
 uents zum ersten mahl widerumb selbst gen Kirchen  
 gangen / ire Sünde gebeicht / darauff den ersten Son-  
 tag des heyligen Aduents das heylige hochwürdige  
 Sacrament des Altars empfangen / vnd dann in dem  
 nechst folgenden 83. Jar zu Liechtmessen widerumb /  
 vnnnd zu heyliger Osterlicher Zeit abermahl / an dem  
 Montag aber vor den heyligen Pfingsten / hat sich ge-  
 dachte Apolonia sampe andern frommen / Edlen vnd  
 Vnedlen Christenlichen Personen auffgemacht / die ver-  
 lobte Walfart gen Saluator aller dings verrichtet / als  
 da mehrmals gebeichtet / vnnnd das heylig hochwürdig  
 Sacrament des Altars / auß den Händē vil vnd offtege-  
 dachtes Herzen Dechants daselbsten empfangen / vnnnd  
 daß / welches je wol vnder die Wunderzeichen / so GOTT  
 der HERR an diesem heyligen ort zum Saluator jährl-  
 chen wircket / zu zehlen von der zeit an als ihr wider ge-  
 holffen / hat sich das Fraischlach an jr / wie ein jeder ver-  
 stendiger bey einem solchen jamer leichtlich zuerachten /  
 etlich mal eraignet. Alsbald sie aber diese jr aufferlegte  
 Walfart verrichtet / hat sie seithero dieses ganze Jar  
 vber das aller wenigste mehr gefület. GOTT der HERR.  
 beware offermelte Apoloniam / vnd vns alle mit  
 einander hinfüro vor allem vbel an Seel  
 vnd Leib ewigklich. Souil  
 von diesem.



Bez





**Beschluß dieser Be-**  
**schrift / wie auch vielgemelter Herr Des-**  
**chant / dreyen andern / einer Manns vnd**  
**zweyen Weibs Personen ge-**  
**holffen.**

**W**Als aber sich dieses jüngst abgeloffe-  
 nen 83. Jars / als den siebenden Ju-  
 lij / den 16. Septembris / vnd dann  
 auch den 21 Octobris / mit gleicher  
 gestalt dreyen armseligen Personē  
 darunder die ein etlich vnd dreyssig

Meil wegs / gar auß dem Stiffst Passaw hieher  
 kommen / zugetragen / vnd wie sie (Gott lob) all  
 widerumb / beyde an Seel vnd Leib frisch vnd  
 gesundt mit Freuden von dannen geschieden / das  
 selbig / dieweil es auff dieses mal zu erzelen zu lang /  
 stellen wir ein. Doch damit jedermäniglich see  
 he vnd erkenne / wie ein Gottlose / leichtfertige /  
 teufelische / verdambliche / böse / schädliche Ges-  
 wonheit es seye / stättigs mit dem Teufel vmb-  
 gehen / denselben nennen / als wie leider dieser Zeit  
 bey Jungen vnd Alten ganz gemeyn / das sie  
 sprechen / wann ich das thue / oder hab ich es ge-  
 than / so füre mich (Gott vnd das heylig +  
 behüte vns darvor.) der Teufel hin / zerreisse

Man sol den  
 Teufel nicht  
 wie dz sprich  
 wort laut /  
 vncer die hür  
 mal / er kom-  
 met sonst wol  
 hineyn.

mich



nich in den Lüfften / gehe hin / komme her / oder  
thue das / in des Teufels Namen / &c.

Solchen Gottlosen vnchristlichen Leuten/  
können mir zum Beschlusß / zu einer trewhertzigen/  
wolmeynenden Warnung nicht vmbgehen /  
ein warhafft vnd vor wenig kurzen Jaren vnes  
fern von vns geschehene ganz erschröckliche Hi  
ostri / zuerzelen.

Folgt ein  
auch erschro  
ckliche W  
dergeschicht.

Disen An  
stant hat ein  
alter Edel  
mä auch An  
stant von Se  
tendorf zu  
Worndorff  
auff der Lauf  
gehebt.

**Z**W Wisenbruck / zwischen Arnberg vñ grossen  
Riet / in dem Stiffte Eystätt gelegen / welches  
Wisenbruck dem Edlen vnd vesten Hannß Wil  
helmen Schencken von Geyrn zu Siburg / diser  
Zeit Eystättischer Pfleger zu Wernfels / vnd dan  
ihrer vest Brudern Friderichen Schencken zu  
Geyrn zuständig / hat einer mit Namen Anstant  
genannt / häußlich gewohnet / wie nun sein erste  
Hausfraw stirbt / verheyrat er sich hernach wie  
derumb gen Goltbuhel zu Barbara Hallerin einer  
Witfrawen. Eh vnd dann sie aber zusammen vñ  
Hochzeit hielten / kam durch böser Leut Anstift  
tung / ein solche Judas Rew vnd Zwoyträchtigkeit  
dareyn / das keines das ander haben wolt / vnd er  
Anstant sonderlich auff ein Zeit auß zornigem  
Grimm / ein erschröckliche Red that / vnd sich of  
fentlich hören ließ / wann er sie sein Vertrawte Bes  
hielt / so solt in der Teufel mit Leib vnd Seel hin  
füren / vnd in den Lüfften zerreißen. Nun was ge  
schicht /



schicht / wie sie etwas verzürnet / legèn sich beyde  
 Parteyen Freundschaft dareyn / vnnnd machen  
 widerumb ein newe Heyrats Vergleichung / das  
 ihnen zweyen wol vermeynt / vnnnd mit einander  
 Hochzeit zu halten wolgewölt / also trägt sich  
 hernacher bald zu / das er Anstant von Wisen-  
 bruck auß / zu seiner versprochenen zum Goldbubel  
 gehen / vnnnd mit ihr der Hochzeit halben allerley  
 abreden vnnnd handeln wil / In dem / wie er in den  
 Wald zwischen Arberg vnd Zelesfeld kompt / vnd  
 auff Goldbubel zugehen wil / vrpötzlich wehet ih-  
 ne Anstant ein Wind an / vnnnd kompt gleichsam  
 von Sinnen / das er schier nimmer weiß wie ihme  
 ist / in dem nimbt ihn der böse Feind hinten bey sei-  
 ner breyten starcken Gürtel / vnnnd füret ihn hoch  
 in den Lüfften hinweg / nun vnangesehen / das er  
 nicht sonders gewußt wie ihm geschehe / so hat er  
 sich dessen gar wol wissen zuberichten / wie ihn der  
 böse Feind also in den Lüfften gefüret / hab er dan  
 noch so viel Verstands vnd Krafft gehabt / das er  
 eines oder drey mal geschryen / O Jesus steh mir  
 bey / wie wil mir nur geschehen / wie er Jesum an-  
 gerufft / hat ihn der Böse länger nit führen können /  
 aber eh er in hat fallen lassen / hat jme Anstant der  
 böse Feindt alle seine Kleyder / als Strimpff / Ge-  
 ses / wüllen Hemmet vnnnd Wammes / alles am  
 Leib zu lautern Kleinen Drimmern zerlumpt / zers-  
 rissen / vnnnd dann ihne Anstant an seinem ganzen

Der Röß  
 fürs ja in den  
 Lüfften hin-  
 den bey seiner  
 starcken Gü-  
 tel.

Alle seine  
 Kleyder zers-  
 reißt er ihme  
 zu kleinen fe-  
 nen.



Leib durchaus dermassen zertrübt vnd zerrissen /  
 das einer mit keiner Nadel so noch vnuerlegt nit  
 het stupffen können. Darauf er ihn hernacher in  
 dem Holz / in ein solche vngעהure / vnheimliche  
 Klingen geworffen / das weder Diehe / Leut /  
 Son noch Mon dahin komie noch scheine. Wie er  
 nun ein zeitlang in diser Wildtnus / in einē tieffen  
 dornigen Graben gelegen / doch letztlich wider  
 ein wenig zu sich kommen / gesehen / wie erschrock  
 lich vnd erbärmlich er an seinem ganzen Leib  
 zerrissen / hat er angefangen fort zu krüchen / vnd  
 ihme Gott der Herr auff sein fleissig berten vnd  
 anruffen auß dem Gehülz geholffen. Als er einen  
 Schäfer von fern ansichtig worden / hat er dem  
 vmb Hülff zugeschryen / vnd also widerumb gen  
 Wisenbruck in sein Behausung gebracht worden.  
 Aber von stundan gesehen das er dises Jammers  
 sterben must / nach Herrn Ioan. Scherer Pfarrers  
 verweser zu grossen Ried dahin dann Wisenbruck  
 eingepfärt geschickt / sich mit den heyligen hoch  
 würdigen Sacramenten wöllen lassen bewah  
 ren / wie der nit anheims / hat man bey dem wür  
 digen vnd wolgelehrten Herrn Marcisso Koro  
 wang / damals vnd noch der Zeit Pfarrer zu Al  
 berg angesucht / der alsbalden kommen vnd dies  
 sen Anstant so armselig an seinem ganzen Leib  
 gesundē daruon nit zuschreiben. Wie nun gedach  
 ter Herr Pfarrer besunden / das gedachter An  
 stant

Anstant lest  
 sich mit dem  
 h. Sacra  
 ment versee.



stant gar ein gutes Gewissen/vnd vber diese vor-  
ermelte erschrockliche Red vnd andere seine be-  
gangene Sünde Rew vnd Leyd gehabt/hat er  
ihne mit den heyligen Sacramenten versehen/  
vnd ist am dritten Tag ganz Christenlich ver-  
schiden/vnd darauff gestorben/allein vmb dieser  
Red willen sey ihm dises widerfaren.

Der Allmächtig Gott in dem hohen Himmel  
gebe Genad/darmit alle rohe Gottlose vbelflu-  
chende in allen Sünden/Schanden vñ Lastern  
verstockte ersoffene Menschē/die der leydig Sas-  
than gleich auch also wie dieses arme erste Men-  
sche dermassen verblent vnd bezaubert/das sie je-  
ewiges gewises Verderben nit sehen kōnden noch  
wōllen/ihne doch dise zwo erschrockliche Wun-  
dergeschicht lassen ein getrewe Warnung/Spie-  
gel vnd Exempel seyn/vnd nicht wie leyder diser  
Zeit schier in der ganzen Welt bey allen Ständen  
im freyen Gang ein Leben verführen/gleichsam  
als wann kein Gott in dem Himmel/vnnd kein  
Teufel in der Höllen/ja kein ewige Freud vnnd  
Seligkeit der frommen Gottsförchtigen/vnnd  
hinwiderumb kein ewiges Ach/Weh/Pein vnd  
Marter der Gottlosen verdampfen mehr wāre.

Habē dan dise einzige schalckhaftige böse Gei-  
ster/sonach der Lehr des 5. Apostels/obē in den  
Lufften wohnen/denen Gott vnd seine 5. Engel  
ipen Mutwillen/wie sie gern woltē noch der zeit:

Ephes. 6.



mit aller dings verhengē vnd nachgebē / Solches mörderisches / tyrannisches / vnbarmerziges Zerren / Reissen / Peynigen vnd Martern an disen Menschen allhie auff Erden / da es doch noch in der Zeit der Gnaden ist / kommen Verführer / vnd ihr teuflisches neidiges Hertz also mögen erkülen.

Marth. 8. 13. 22.  
24. 25.  
Luca 12. 13.  
Iob 10. 24.  
Apoc. 9.

Ach du gerechter Gott vom Himmel / gibe es allen Todtsündern vnd Sünderin zuerkennen / was dan für grausames / vn menschliches / vnaussprechliches / jmer vnd in Ewigkeit wrender / keinen einigen Augenblick auffhörendes Brinnen / Braten / Heulen / Weinen / Zeckenklappern / Grifgranen wirdt / vermög der heyligen Schrift / allen dem Teufel frey in seinen Gewalt vbergebenen Verdambten begegnen / allda nichts anders / dann ein ewiges wünschē vnd begeren zu sterben vnd doch nit ersterben können / sonder der Todt wirdt vor ihnen fliehen / stetter vnleydlicher grausamer Gestand / Hunger vnd Durst.

Iaculis 2.

Solche innerliche vñ äusserliche dicke Finsternus / in welchem der Mensch mehrers nit / dann was ihme seine Peyn vnd Marter grösser macht / allein wirdt sehen können / ein ewige Gefängtnus / da kein Erlösung nimmermehr



zu hoffen/vnd welches vnter allem das allerer-  
 schröcklichstes / das sie die Verdambten Gott  
 das höchste Gut selbst/sich jr Leib/Seel/Vat-  
 ter / Mutter / Brüder / Schwester / Freundt/  
 Bekannte/ Haab/ Gut vñ alle Creaturen ewig  
 verfluchen vñ vermaledeyen werden / da auch  
 in dem Herzen ein ewiger/kliefender/nagender  
 Wurm seyn wirdt / darumben das sie hie auff  
 Erden/die edle/schöne Zeit der Gnaden so vbel  
 angelegt/versaunt/vnnd nun mehr darob ein  
 steines Hertz zerbrechē/von Gottes seiner En-  
 gel vnd aller lieben heyligen Freundt Gottes/  
 Gemeynschafft vnd Anschawung in Ewigkeit  
 abgesondert/vñ dafür/welches auch der für-  
 nemsten Peyn eine/die aller erschröcklichsten/  
 abschewlichsten/heflichsten/grewlichsten Teu-  
 fel werden anblicken müssen/vnd also in Sum-  
 ma ihnen die Thür der Gnaden ganz vnd gar  
 verschlossen / aller Trost/Hilff vnd Barmher-  
 zigkeit Gottes von jnen gewichen/ Gott seine  
 Engel/ die lieben Heyligen vnd alle Creaturē/  
 sich wider sie/ die Verdambten/darumben das  
 sie so vnweislich gehandelt haben/ernstlich se-  
 zen/vnd es allein vermüg der H. Schrifft lau-  
 ten wirdt/Nach der menig der Sünden/schen-  
 det ihme eyn/Qual vnnd Peyn / womit er hat

Esaiē 14. 66.  
 Marci 9.  
 Ecclesi. 7.  
 Iudic 16.

Sap. 5.

Apo. 18.  
 Sap. 11.



gesündiget / darmit soll er auch gestrafft werden / vnd wie der Sünden / also auch der Peynen vil / mancherley vñ vnderschiedlich. Dann erstlichen wirdt der Fürst / König vnd Obriste aller Teufel vñ Hellschen Geister / das ist / Lucifer neben vñ mit jm seines Hellschen Reichs / die sieben mit regierende Fürsten vnd getrewe Haupt vñ Befehlsleut / als Lemathan / Behe-  
 mot / sambt allen ihrem hierzu bestelltem Hoff-  
 gesind / vber die / so in der Todtsünd / der Hoch-  
 färtigkeit verstorbene / Namona vnd seine Is-  
 grimmige vnarmherzigen Soldaten / vber  
 die betrogenen / vnarmherzigen Geyzhälf.

Tob 4. 4.

Matth. 6.

Tobias 9.

Lucæ 11.  
Psalms 105.

Iudicum 9.

1. Reg 7.

Asinodens neben vñnd mit ihm ein grosser  
 ganz stinckender hauffen Hurn Teufel / vber  
 alle vnkeusche / vnzüchtige / verbübte / vnreine.  
 Beelzebub vnd sein ganze Rott aber die Ney-  
 digen. Beelphegor mit allen seinen Hellschen  
 Köchen / Kellern / Karten vnd Würffel Kräs-  
 mern / vber alle stette Fresser / Sauffer / Spiler  
 vnd Rasler. Baalberith vñnd seine Zunftge-  
 sellen / vber alle Vngeduldige / Zornige / Giffti-  
 ge / Vbelsprechende. Vñnd dann letzlichen Asa-  
 roth mit seinem ganzen auffgerichtten Fanlein /  
 vber die Faulen vnd Gottlosen / vñnd zu allem  
 guten / tregen / abgeleitben / armen Verdambten.

Eoma



Kommen/vnd jezunder die Seel aber nach dem  
Jüngsten tag/ Seel vnd Leib/ ein jeglicher das  
seinige/ jmer vnd in Ewigkeit peynigen/ vnn  
an allen Gliedern/ daran diser Sündē eine oder  
mehr begangen/ zu gleich Straffen.

Das wollen alle arme inn Todtsünden li-  
gende Menschen/ ihne lassen zu Herzen gehen/  
vñ allhie in der Zeit der Gnaden rechte Früchte  
der Buß würcken/ Gott herzlich vmb Ver-  
zeyhung bitten/ dieselben ire Sünde berewen/  
beichten vnd büßen/ vnd also durch dise einige  
Mittel/ solcher Peyn vnd Marter entfliehen/  
vnd durch die vberreichen Verdienst **IESU**  
**CHRISTI**/ welcher je nit wil den Todt  
des Sünders/ erlange die ewigen Freud  
vnd Seligkeit / **AMEN**/  
**AMEN**.

Cum Licentia superiorum,





1875403

*[Faint, illegible text, likely bleed-through from the reverse side of the page]*

ocn 67853803



ex utas subinfertur. Quia di pque da  
is lucimur. in quibusdā noxie ligam;  
et. incommutabilitatis. statum non tenet.  
per . . . a semetipsa defluens  
is sumpit. Vanitate ergo ad iniqui  
asit. que ad succa rebus mutabilib;  
et dalia semp impellitur. Sub orientib;  
et cōtinatur. Potest tamen et uanitas  
luco egi. et iniquitatis nomine reatus  
ū monstrari. Si enī aliqđo uanitas culpa  
ni salmista non diceret. quāquam  
di dī ambulet homo. tamen uane con  
tur. Thesaurizat et ignorat cui congre  
ire. quamuis trinitatis imaginē in  
Et emus. uanis tamen delectationis  
et murbari. In conuersatione . . . delin  
q; modis nos semp alternantib;. Cu  
m tuiat. metus frangat. Letitia mulceat.  
et quigat. Ex uanitate ergo ut superius



